



SLUŽBENE NOVINE GRADA ZENICA

GODINA XLIV
Broj 8

Ponedjeljak 19.11.2018. godine

ISSN 1840-4588

GRADSKO VIJEĆE

162.

Na osnovu člana 13. stav (2) Zakona o principima lokalne samouprave u Federaciji BiH ("Službene novine Federacije Bosne i Hercegovine", broj: 49/06 i 51/09), člana 4. stav (2) Zakona o cestama Federacije Bosne i Hercegovine ("Službene novine Federacije BiH", broj: 12/10, 16/10 i 66/13) i člana 21. tačka 2) Statuta Grada Zenica ("Službene novine Grada Zenica", broj: 5/15), Gradsko vijeće Zenica, na 29. sjednici, održanoj 18. oktobra 2018. godine, donijelo je

ODLUKU O NERAZVRSTANIM CESTAMA GRADA ZENICA

I - OSNOVNE ODREDBE

Član 1.

Ovom odlukom uređuje se upravljanje, izgradnja i rekonstrukcija, zaštita, korištenje i održavanje nerazvrstanih cesta kao i poslovi nadzora nad tim cestama na teritoriji grada Zenica.

Član 2.

Nerazvrstana cesta je površina koja se koristi za saobraćaj po bilo kojoj osnovi i koja je pristupačna većem broju korisnika, a nije svrstana u kategoriju javnih cesta (u daljem tekstu: cesta).

Član 3.

Nerazvrstane ceste, kao dobra u općoj upotrebi, su u državnoj svojini, na njima se ne mogu sticati prava po bilo kojoj osnovi, osim prava određenih ovom odlukom.

Član 4.

Nerazvrstane ceste, zajedno sa javnim cestama (lokalne ceste i gradske ulice), čine mrežu cesta na

području grada Zenica i biće upisane u katastarski operat.

II - UPRAVLJANJE NERAZVRSTANIM CESTAMA

Član 5.

Poslove upravljanja, izgradnje i rekonstrukcije, zaštite, korištenja i održavanja cesta kao i poslove nadzora na cestama obavlja nadležna služba za komunalne poslove (u daljem tekstu: Upravitelj).

Član 6.

(1) Upravljanje cestama u smislu ove odluke obuhvata:

a) korištenje, organizovanje i obezbjeđivanje minimalnih uslova za nesmetano odvijanje saobraćaja;

b) vršenje javnih ovlaštenja (odobrenje za: vanredni prijevoz, prekomjernu upotrebu cesta, izgradnju objekata i instalacija, priključaka odnosno prilaza, izgradnju autobuskih stajališta, poprečno postavljene instalacije, odobrenje za postavljanje reklama, nalog za obustavu bespravnih radnji i otklanjanja smetnji na cesti i u zaštitnom pojasu);

c) vršenje poslova zaštite cesta, odnosno zabrana ili ograničenja intervencija na cesti i slično;

d) organizovanje stručnog nadzora nad održavanjem i zaštitom cesta;

e) vođenje evidencije (baze podataka) cesta, a na osnovu podataka dobijenih od nadležne službe za imovinsko-pravne, geodetske poslove i katastar nekretnina.

(2) Upravljanje cestama u smislu ove odluke jeste i planiranje razvoja mreže cesta i utvrđivanje trase puta.

III - IZGRADNJA I REKONSTRUKCIJA NERAZVRSTANIH CESTA**Član 7.**

(1) Pod izgradnjom cesta, u smislu ove odluke, smatra se izgradnja cesta pretežno po novoj trasi, uz prethodno pribavljeno odobrenje nadležne službe za urbanizam.

(2) Osnovni konstruktivni elementi ceste moraju se dimenzionirati i graditi tako da zadovoljavaju minimalnu širinu kolovoza od 4,5 metra za dvosmjerni i 3,0 metra za jednosmjerni saobraćaj sa uredjenim proširenjima za mimoilazanje i sa konstruktivnim elementima koji podnose osovinsko opterećenje do 6 tona.

(3) Širina zaštitnog pojasa ceste u kome se ne mogu graditi stambene i druge zgrade, kopati bunari, septičke jame, otvarati deponije i drugo, podizati zasade koji smetaju prohodnosti i preglednosti puta, iznosi tri metra.

(4) Iznad cijele širine kolovoza ceste mora biti slobodan prostor od najmanje 7 m.

(5) Plan izgradnje cesta donosi Gradsko vijeće na prijedlog Gradonačelnika.

Član 8.

(1) Pod rekonstrukcijom ceste smatraju se radovi na dijelu postojeće ceste kojim se bitno mijenjaju njene tehničko-građevinske karakteristike i osnovni konstruktivni elementi u cilju povećanja kapaciteta ceste i poboljšanja uslova prometnih usluga.

(2) Pod sanacijom ceste smatraju se radovi na dijelu postojeće ceste kojima se poboljšavaju postojeći osnovni elementi ceste i opća sigurnost učesnika u saobraćaju.

Član 9.

(1) U slučaju izgradnje i rekonstrukcije ceste, odnosno kod vršenja radova koji iziskuju premještanje postojećih instalacija u cestovnom pojasu, vlasnici tih instalacija su dužni o svom trošku izmjestiti te instalacije odnosno prilagoditi ih nastalim promjenama.

(2) Investitor radova iz stava (1) dužan je, najmanje tri mjeseca ranije, obavijestiti vlasnika instalacija o početku radova i omogućiti mu uvid u raspoloživu dokumentaciju, ali nije obavezan pribavljati saglasnost vlasnika postojećih instalacija.

(3) U slučaju da vlasnik instalacija, ne izvrši obavezu iz prethodnog stava, investitor radova na izgradnji i rekonstrukciji ceste izvršit će premještanje postojećih instalacija na teret vlasnika instalacija.

Član 10.

(1) Pod priključkom na cestu, u smislu ove odluke, smatra se spoj ceste i druge uređene površine sa koje se vozila i drugi učesnici u saobraćaju direktno uključuju u saobraćaj ili isključuju iz saobraćaja.

(2) Priključak na cestu se može izvesti samo na osnovu odobrenja izdatog od strane Upravitelja.

(3) Troškove izgradnje priključka na cestu u skladu sa projektom saobraćajnog priključka i izdatim odobrenjem snosi investitor priključka.

(4) Priključak na nerazvrstanu cestu sa asfaltiranim kolovozom, mora se asfaltirati u dužini od najmanje 5 metara, računajući od mjesta priključenja na nerazvrstanu cestu.

IV - ODRŽAVANJE NERAZVRSTANIH CESTA**Član 11.**

(1) Održavanje ceste podrazumijeva izvođenje radova kojima se obezbjeđuje minimum nesmetanog i bezbjednog saobraćaja i čuva upotrebna vrijednost nerazvrstanih cesta.

(2) Radovi na održavanju ceste mogu biti redovni i vanredni.

(3) Redovno održavanje obuhvata:

a) popravak kolovoza, trupa ceste, potpornih i obložnih zidova i objekata na cesti;

b) saniranje udarnih rupa na kolovozu;

c) čišćenje kolovoza, zaštita kosina, nasipa, usjeka i zasjeka;

d) zamjenu i popravak prometne signalizacije i ostale opreme na cesti;

e) održavanje potrebne preglednosti ceste i znakova u cestovnom pojasu;

f) košenje trave i održavanje zelenih površina u cestovnom pojasu;

g) održavanje bankina;

h) čišćenje snijega s kolovoza i autobusnih stajališta;

i) posipanje kolovoza u slučaju poledice i

j) obavljanje drugih poslova kojima se osigurava stabilan i siguran saobraćaj na cestama.

(4) Vanredno održavanje nerazvrstanih cesta su obimniji radovi i mogu se izvoditi samo na osnovu tehničke dokumentacije, bez pribavljanja saglasnosti i druge dokumentacije prema Zakonu o prostornom uređenju.

(5) Vanredno održavanje nerazvrstanih cesta obuhvata:

a) obnavljanje, ojačavanje ili zamjenu kolovoznog zastora i potpornih zidova;

b) ojačavanje propusta i mostova, zamjenu propusta i zaštita čelične konstrukcije;

c) izradu pješačkih staza i ugrađivanje ivičnjaka;

d) obavljanje i drugih obimnijih poslova koji ne spadaju u redovno održavanje.

(6) Hitno održavanje cesta uslovljeno je elementarnim nepogodama i vanrednim okolnostima, a obuhvata aktivnosti koje je neophodno sprovesti kako bi se otklonili nedostaci i time obezbjedilo nesmetano odvijanje saobraćaja ili odvijanje saobraćaja u otežanim uslovima, kada je onemogućena prohodnost i ugrožena bezbjednost učesnika u saobraćaju.

V - ZAŠTITA I KORIŠTENJE NERAZVRSTANIH CESTA

Član 12.

Pod zaštitom ceste u smislu ove odluke podrazumijeva se:

a) zaštita cesta od prekomjernog opterećenja, od prekoračenja ukupne mase i osovinskog opterećenja;

b) zaštita od gradnje objekata u cestovnom pojasu i sprječavanje vršenja radnji na cesti i u cestovnom pojasu kojima bi se mogla oštetiti cesta odnosno ugroziti saobraćaj ili povećati troškovi održavanja ceste;

c) regulisanje gradnje prilaznih cesta, autobuskih stajališta, parkinga, benzinskih pumpi i sl.;

d) osiguranje preglednosti na raskrsnicama i krivinama;

e) regulisanje odnosa sa vlasnicima, odnosno korisnicima zemljišta uz cestu;

f) sprečavanje deponovanja materijala na cestu ili uz cestu;

g) regulisanje postavljanja kablova, vodova i instalacija u trupu ceste i u cestovnom pojasu;

h) regulisanje odvodnje, prokopavanja cestovnih i odvodnih kanala;

i) regulisanje ograničenja i obustave saobraćaja;

j) regulisanje postavljanja i dopune saobraćajne i turistčke signalizacije;

k) regulisanje postavljanja reklamnih znakova;

l) vođenje evidencija cesta, cestovnog pojasa, saobraćajne signalizacije i opreme na cestama;

m) kontrola gradnje ograda uz cestu;

n) uklanjanje pokvarenih, napuštenih i oštećenih vozila sa ceste ili cestovnog pojasa;

o) vršenje drugih radnji u svrhu zaštite nerazvrstanih cesta.

Član 13.

(1) Prekomjerno opterećenje ceste podrazumijeva njenu upotrebu iznad vrijednosti saobraćajnog opterećenja iz člana 7. stav (2) ove odluke kao i učestalo saobraćanje istih vozila sa teretom po istim dionicama ceste, nastalu zbog obavljanja djelatnosti pravnih i fizičkih lica uz cestu ili preusmjerenja saobraćaja na cestu zbog zatvaranja javne ceste na duže od 10 dana.

(2) Za prekomjerno korištenje ceste podnosi se Upravitelju zahtjev za izdavanje odobrenja za prekomjernu upotrebu ceste.

Član 14.

(1) Vozila na cesti moraju ispunjavati određene uslove u smislu dozvoljenih dimenzija, ukupne mase i osovinskog opterećenja.

(2) Prijevoz vozilima koja, prazna ili zajedno sa teretom, prelaze dozvoljenu težinu, osovinski pritisak ili dimenzije, odnosno granice dopuštenog opterećenja na cestama smatra se vanrednim prijevozom.

(3) Uslovi i način na koji se vanredni prijevoz može vršiti utvrđuje se u odobrenju za vanredni prijevoz, koje je obavezan da pribavi prevoznik od Upravitelja.

Član 15.

Radi sprječavanja ugrožavanja stabilnosti ceste i obezbjeđenja uslova za nesmetano odvijanje saobraćaja na cesti, zabranjeno je zauzimanje ceste i izvođenje bilo kakvih radova ili radnji kao što su:

a) prosipanje, bacanje i ostavljanje bilo kakvih predmeta, materijala i smeća na cestu;

b) ispuštanje otpadnih i drugih voda na cestu ili putni jarak;

c) sprečavanje oticanja vode sa ceste, a posebno iz putnog jarka i iz propusta kroz trup ceste i sprječavanje daljeg oticanja ka njihovim recipijentima;

d) ostavljanje vozila kojim se ometa bezbjedno i nesmetano odvijanje saobraćaja;

e) iscrtavanje i brisanje horizontalne saobraćajne signalizacije, oštećivanje, premještanje, zaklanjanje, okretanje i otuđivanje vertikalne saobraćajne signalizacije i cestovne opreme;

f) svako činjenje kojim se oštećuje ili bi se mogla oštetiti cesta, povećati troškovi održavanja ceste ili ugroziti stabilnost ceste ili sigurnost saobraćaja i dr.

Član 16.

Cestovno zemljište odnosno cestovni pojas, može se povjeriti na korištenje pravnim i fizičkim licima uz prethodno pribavljeno odobrenje Upravitelja radi:

a) obavljanja djelatosti kojima se pružaju usluge vozačima i putnicima;

b) gradnje komunalnih, vodoprivrednih i drugih objekata i instalacija i postavljanja priključaka na javne ceste (elektronski, telefonski, antenski priključci i sl.)

c) postavljanja reklamnih tabli, reklamnih panoa i drugih natpisa;

Član 17.

(1) Na mjestima međusobnog ukrštanja ceste sa javnim putem ili željezničkom prugom u istom nivou, moraju se obezbijediti zone potrebne preglednosti u skladu sa propisima.

(2) U zonama potrebne preglednosti zabranjeno je: podizati zasade, ograde, drveće, postavljati postrojenja, uređaje i graditi objekte, odnosno vršiti druge radnje koje ometaju preglednost ceste i željezničke pruge.

Član 18.

Vlasnici, odnosno korisnici zemljišta koja graniče s nerazvrstanom cestom, dužni su:

a) održavati živice,

b) ukloniti drveće ili dijelove krošnje drveća

koje otežavaju promet ili onemogućavaju zračenje i sušenje ceste.

c) ugraditi betonske cijevi odgovarajućeg profila na pristupnim prijelazima preko jaraka u nivou s cestom i iste održavati u funkcionalnom stanju.

Član 19.

(1) Upravitelj može da zabrani saobraćaj na dijelu ceste za sva ili za pojedine kategorije vozila na cijeloj cesti, njenom dijelu ili putnom objektu, i to:

a) ako se cesta nalazi u takvom stanju da se na njoj ne može odvijati saobraćaj ili se ne može odvijati saobraćaj pojedinih vrsta vozila;

b) ako bi saobraćaj pojedinih vrsta vozila nanosio štetu cesti, njenom dijelu ili putnom objektu;

c) ako se radovi na održavanju ceste ne mogu izvesti bez obustavljanja saobraćaja.

d) ako to zahtijevaju drugi razlozi bezbjednosti saobraćaja.

(2) Opšta zabrana saobraćaja na cesti, njenom dijelu ili putnom objektu može bitisamo privremena.

(3) Zabrana saobraćaja za pojedine kategorije vozila na cesti, njenom dijelu ili putnom objektu, može biti privremena ili stalna.

(4) Izmjena režima saobraćaja mora se pravovremeno objaviti na web stranici Grada i na drugi pogodan način.

VI - ODOBRENJA UPRAVITELJA I NAKNAD

Član 20.

(1) Upravitelj u okviru vršenja javnih ovlaštenja u upravnom postupku po službenoj dužnosti ili po zahtjevu stranke donosi rješenje kada odlučuje o izdavanju:

a) odobrenja za vanredni prijevoz;

b) odobrenja za prekomjernu upotrebu ceste;

c) odobrenja za izgradnju objekata i instalacija unutar cestovnog pojasa i zaštitnog pojasa ceste;

d) odobrenja za izgradnju priključaka, odnosno prilaza;

e) odobrenja za izgradnju autobuskih stajališta;

f) odobrenja za poprečno postavljanje instalacija;

g) odobrenja za postavljanje reklama;

h) odobrenja za privremenu izmjenu režima saobraćaja;

i) naloga za obustavu vršenja bespravnih radnji i otklanjanja smetnji na cesti i u zaštitnom pojasu.

(2) Zahtjevi za izdavanje odobrenja i naloga iz stava (1) podnose se Upravitelju na obrascu čija je forma propisana podzakonskim aktima.

Član 21.

(1) Naknadu za vanredni prijevoz plaća prevoznik, odnosno vlasnik motornog vozila koje obavlja vanredni prevoz i utvrđuje se na osnovu naznačenih graničnih vrijednosti ukupne mase, dimenzije i osovinskog opterećenja vozila što je propisano Pravilnikom o utvrđivanju uslova za obavljanje vanrednog prijevoza.

Član 22.

(1) Visina naknade za korištenje cestovnog zemljišta i cestovnog pojasa za obavljanje djelatosti kojima se pružaju usluge vozačima i putnicima (benzinske stanice, hoteli, moteli, ostali ugostiteljski objekti, autoservisi i drugi objekti) obračunava se u m² na godišnjem nivou i iznosi 2,00 KM/ m².

(2) Visina naknade za korištenje cestovnog zemljišta i cestovnog pojasa obračunava se po m¹ na godišnjem nivou i iznosi:

a) za građenje komunalnih, vodoprivrednih i drugih objekata (instalacije, cjevovodi i sl.) 0,75 KM/ m¹

b) za infrastrukturne vodove (telekomunikacijske i elektronske kablove i sl.) 0,75 KM/ m¹ ;

(3) Za korištenje cestovnog zemljišta za postavljanje reklamnih tabli, reklamnih panoa i drugih natpisa, visina naknade se obračunava se u m² na godišnjem nivou i iznosi:

a) jednostrana reklama neosvijetljena 10,00 KM/ m²;

b) jednostrana reklama osvijetljena 20,00 KM/ m²;

c) dvostrana reklama neosvijetljena 15,00 KM/ m²;

d) dvostrana reklama osvijetljena 30,00 KM/ m².

(4) Naknade iz ovog člana obračunavaju se od dana donošenja rješenja do 31.12. tekuće godine, dok se za svaku narednu godinu korištenja cestovnog zemljišta donosi novo rješenje u kojem je obračunski period od 01. 01. do 31. 12. odnosno godine.

(5) Naknada za građenje komunalnih, vodoprivrednih i drugih objekata (instalacije, cjevovode i sl.) se za prvu godinu plaća u punom obračunatom iznosu, a za svaku narednu godinu naknada se plaća u vrijednosti od 50% obračunatog iznosa za prvu godinu korištenja.

(6) Naknade iz ovog člana obračunavaju se za korištenje cestovnog zemljišta i cestovnog pojasa u obuhvatu ostalog građevinskog zemljišta.

VII - FINANSIRANJE NERAZVRSTANIH CESTA

Član 23.

Finansiranje održavanja i zaštite cesta obezbjeđuje se iz sredstava budžeta Grada Zenica, zainteresovanih privrednih društava, odnosno drugih pravnih lica, i drugih sredstava.

VIII – NADZOR

Član 24.

(1) Nadzor nad primjenom ove odluke vrši Upravitelj.

(2) Poslove inspekcijuskog nadzora nad primjenom ove odluke i drugih akata donijetih na osnovu ove odluke vrši inspektor za ceste Grada Zenica (u daljem tekstu: inspektor).

Član 25.

Inspektor vršeći inspekcijuski nadzor u skladu sa ovom odlukom, ima sljedeća prava i dužnosti:

a) pregledati stanje cesta;

b) pregledati radove na izgradnji, rekonstrukciji, sanaciji, održavanju i zaštiti cesta;

c) pregledati radove koje se obavljaju na cesti u zaštitnom i cestovnom pojasu cesta;

d) pregledati tehničku dokumentaciju u vezi sa radovima iz tački b) i c) ovog člana (dozvole, saglasnosti, projekti, standardi);

e) pregledati planove, programe, ugovore i ostalu dokumentaciju koja se odnosi na održavanje i zaštitu nerazvrstanih cesta;

f) pregledati provođenje mjera za osiguranje cesta i saobraćaja na njima;

g) pregledati provođenje propisanih uvjeta za obavljanje zahvata u cestovnom i zaštitnom pojasu cesta;

h) pregledati obavljanje upravnih i stručno-tehničkih poslova na cestama.

Član 26.

(1) Inspektor vršeci inspekcijski nadzor, ima pravo:

a) pregledati uređaje, materijale, dokumentaciju izvođača na gradnji, rekonstrukciji ili održavanju cesta;

b) saslušati stranke i svjedoke primjenom pravila upravnog postupka;

c) uzeti uzorke materijala, te obavljati druge poslove koji su u skladu sa namjenom inspekcijskog nadzora;

(2) Vršeci inspekcijski nadzor, inspektor ima pravo narediti:

a) obustavu radova koji se izvode na cestama, u cestovnom ili zaštitnom pojasu, suprotno odredbama Zakona o cestama FBiH, ove odluke, tehničkim propisima, standardima i normativima, te dati rok za otklanjanje nedostataka;

b) otklanjanje nedostataka na cestama koji ugrožavaju sigurnost saobraćaja;

c) privremenu zabranu odvijanja saobraćaja na cestama, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje saobraćaja;

d) obustavu saobraćaja cestom motornim vozilima koja zbog tehničkih svojstava ili načina na koji saobraćaju, mogu nanijeti štetu cestama i kada je njihov saobraćaj na cesti u suprotnosti sa zakonom i drugim propisima;

e) isključenje motornog vozila iz saobraćaja na cesti kada utvrdi da dimenzije i ukupna masa ili njegovo osovinsko opterećenje prelazi veličine iz člana 14. ove odluke, a prijevoznik nema odgovarajuću dozvolu za vanredni prijevoz;

f) privremenu zabranu saobraćaja na cesti ako utvrdi da sa gledišta sigurnosti saobraćaja ne ispunjava tehničke uslove;

g) rušenje građevine ili njenih dijelova i drugih objekata na teret investitora, kao i uspostavljanje provobitnog stanja, ako su izgrađene ili se grade na cesti ili cestovnom pojasu bez odobrenja ili saglasnosti ili suprotno uvjetima iz odobrenja, odnosno saglasnosti nadležnog organa;

h) uklanjanje reklamnih znakova u cestovnom

i zaštitnom pojasu postavljenih bez odobrenja ili suprotno uslovima iz odobrenja nadležnih organa;

i) u nužnim slučajevima, kada bi bila ugrožena sigurnost saobraćaja na cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta;

j) da se u polju preglednosti otklone nedostaci i nepravilnosti prouzrokovane kršenjem propisanih mjera za osiguranje preglednosti ceste;

k) poduzimanje i drugih mjera u skladu sa Zakonom o cestama FBiH i drugim propisima donesenim na osnovu ovog Zakona.

Član 27.

(1) Inspektor je dužan, u okviru svoje nadležnosti, bez odlaganja preduzima odgovarajuće prekršajne mjere, ako u vršenju nadzora utvrdi da je počinjen prekršaj iz ove odluke.

(2) Inspektor upravne mjere poduzima donošenjem pisanog rješenja.

(3) Protiv rješenja inspektora donesenog na osnovu ove odluke, može se izjaviti žalba Drugostepenoj komisiji za rješavanje po žalbi protiv rješenja donesenih u prvostepenom upravnom postupku.

(4) Žalba ne odlaže izvršenje rješenja.

Član 28.

Pravna i fizička lica kod kojih se vrši inspekcijski nadzor dužna su omogućiti rad inspektoru, pružiti potrebnu pomoć na njegovo traženje u određenom roku dostaviti podatke i dokumentaciju za vršenje inspekcijskog nadzora u smislu Zakona o cestama FBiH i ove odluke.

IX - KAZNE NE ODREDBE

Član 29.

(1) Za prekršaje utvrđene u ovoj odluci kaznit će se počinitelac ako:

a) vrši izgradnju i rekonstrukciju ceste bez odobrenja nadležne službe Grada Zenica i sa nepotpunom tehničkom dokumentacijom, odnosno suprotno odredbama člana 7., 8., 9., 10. i 11.;

b) ne izmjesti ili ne prilagodi instalacije nastalim promjenama u roku (član 9.);

c) ne poštuje zabrane propisane članom 13., 14., 15., 16., 17., 18., i 19. ove odluke;

d) ne omogući vršenje inspekcijskog nadzora i ne pruži pomoć pri vršenju inspekcijskog nadzora (član 28.).

(2) Novčanom kaznom u iznosu od 500,00 KM do 5.000,00 KM kaznit će se pravno lice, a u iznosu od 100,00 KM do 500,00 KM odgovorno lice u pravnom licu za radnje koje imaju obilježja prekršaja iz člana 26. ove odluke.

(3) Novčanom kaznom u iznosu od 200,00 KM do 2.000,00 KM kaznit će se osoba koja obavlja samostalnu djelatnost ličnim radom (samostalni privrednik, obrtnik) za radnje koje imaju obilježja prekršaja iz člana 26. ove odluke.

(4) Novčanom kaznom u iznosu od 50,00 KM do 500,00 KM kaznit će se građanin odnosno fizičko lice za radnje koje imaju obilježja prekršaja koji se odnosi na fizička lica iz člana 26. ove odluke.

(5) Novčanom kaznom u iznosu od 500,00 KM kaznit će se subjekt nadzora koje ne postupi po rješavanju nadležnog inspektora.

XI - ZAVRŠNE ODREDBE

Član 30.

Ova odluka stupa na snagu osmog dana od dana objavljivanja u "Službenim novinama Grada Zenica".

Broj: 01-01-01-3091/18

Zenica, 18. 10. 2018. godine

*PREDSJEDAVAJUĆI
GRADSKOG VIJEĆA ZENICA
Goran Bulajić, s.r.*

163.

Na osnovu člana 14. stav (4) i člana 16. Zakona o eksproprijaciji ("Službene novine Federacije BiH", broj: 70/07, 36/10 i 25/12)) i člana 21. tačka 2) Statuta Grada Zenica ("Službene novine Grada Zenica", broj: 5/15), Gradsko vijeće Zenica, rješavajući po prijedlogu Gradonačelnika, na 29. sjednici, održanoj dana 18. oktobra 2018. godine, donijelo je

O D L U K U

O UTVRĐIVANJU JAVNOG INTERESA

1. Utvrđuje se da je od javnog interesa uređenje korita Ciganski potok u naselju Topčić Polje, na zemljištu поближе označenom u Elaboratu eksproprijacije broj: 02-1-9655/18 od augusta 2018. godine, koji čini sastavni dio ove odluke.

2. Određuje se da je korisnik eksproprijacije Grad Zenica, koju zastupa Gradsko pravobranilaštvo Zenica.

3. Na osnovu ove odluke Služba za urbanizam, imovinsko-pravne, geodetske poslove i katastar nekretnina Grada Zenica, može pristupiti provođenju postupka eksproprijacije zemljišta navedenog u posebnom prilogu - Elaboratu.

4. Ova odluka je konačna u upravnom postupku, ali se tužbom protiv iste može pokrenuti upravni spor kod Kantonalnog suda u Zenici u roku od 30 dana od dana dostavljanja odluke. Tužba se podnosi neposredno sudu.

O b r a z l o ž e n j e

Služba za imovinsko pravne, geodetske poslove i katastar nekretnina je na prijedlog Gradonačelnika dostavila Gradskom vijeću Prijedlog Odluke o utvrđivanju javnog interesa za uređenje korita Ciganski potok u naselju Topčić Polje, na zemljištu поближе označenom u Elaboratu eksproprijacije broj: 02-1-9655/18 od augusta 2018. godine, koji čini sastavni dio ove odluke.

Predlagač je uz prijedlog dostavio Elaborat eksproprijacije broj: 02-1-9655/18 od avgusta 2018. godine, sačinjen od strane JP za prostorno planiranje i uređenje grada "Zenica" d.o.o. Zenica po narudžbi Grada Zenica.

Uvidom u prijedlog za utvrđivanje javnog interesa proizilazi da se razlozi kojim se traži donošenje ove odluke ogledaju u neophodnoj sanaciji i uređenju korita Ciganski potok.

Polazeći od odredaba:

- člana 14. stav (4) Zakona o eksproprijaciji ("Službene novine Federacije BiH", broj: 70/07, 36/10 i 25/12) kojim se propisuje da: "Odluku o utvrđivanju javnog interesa za izgradnju objekta ili izvođenje radova na području općine donosi općinsko vijeće na čijem se području namjerava graditi objekat ili izvoditi radovi u skladu s planskim dokumentima prostornog uređenja".

- člana 16. istog zakona kojim se propisuje da: "Prijedlog za utvrđivanje javnog interesa za eksproprijaciju podnosi lice koje prema odredbama ovog zakona može biti korisnik eksproprijacije.

Prijedlog za utvrđivanje javnog interesa podnosi se Vladi, odnosno Vladi kantona ili općinskom vijeću, putem federalnog, kantonalnog organa uprave ili općinske službe za upravu za imovinsko-pravne poslove, a sadrži elaborat eksproprijacije (geodetsko - katastarski plan, područja eksproprijacije, podatke o nekretninama za koje se predlaže utvrđivanje javnog interesa, procjenu vrijednosti nekretnina, cilj eksproprijacije i druge podatke za utvrđivanje javnog interesa). Nadležni organ je dužan o prijedlogu za utvrđivanje javnog interesa odlučiti u roku od 60 dana od dana prijema prijedloga.

Aktom o utvrđivanju javnog interesa, u skladu sa odredbama ovog člana, odredit će se i korisnik eksproprijacije.

Protiv akta o utvrđivanju javnog interesa može se pokrenuti upravni spor kod nadležnog suda, osim u slučajevima iz člana 15. ovog Zakona", Gradsko vijeće smatra da je predlagač ispunio uslove za utvrđivanje javnog interesa, pa je na osnovu utvrđenog činjeničnog stanja, a u skladu s naprijed citiranim odredbama Zakona o eksproprijaciji odlučeno kao u dispozitivu ove odluke.

Ova odluka je konačna u upravnom postupku.

Broj: 01-01-3087/18

Zenica, 18. 10. 2018. godine

PREDSJEDAVAJUĆI
GRADSKOG VIJEĆA ZENICA
Goran Bulajić, s.r.

164.

Na osnovu člana 1., člana 3. stav (1) i člana 5. Zakona o postupku prijenosa prava vlasništva na nekretninama u vlasništvu Federacije Bosne i Hercegovine, gradova i općina na nastradalim područjima („Službene novine FBiH“, broj: 59/14), člana 363. stav (3) tačka 5) Zakona o stvarnim pravima („Službene novine FBiH“, broj: 66/13 i 100/13) i člana 21. tačka 7) Statuta Grada Zenica („Službene novine Grada Zenica“, broj: 5/15), Gradsko vijeće Zenica na 30. sjednici, održanoj dana 05. novembra 2018. godine, donijelo je

ODLUKU

o dodjeli građevinskog zemljišta u vlasništvu Grada Zenica licima izabranim u projektu oporavka od poplava i klizišta iz maja i avgusta 2014. godine

Član 1.

Ovom odlukom dodjeljuje se građevinsko zemljište u vlasništvu Grada Zenica, KO Topčić polje (područje Bistričaka), licima izabranim u projektu oporavka od poplava i klizišta iz maja i avgusta mjeseca 2014. godine po osnovu Razvojnog programa „UNDP-a“ i „Arbeiter Samariter Bund ASB“, u kojem učestvuje i Grad Zenica kao jedinica lokalne samouprave.

Član 2.

Zadužuje se Služba za urbanizam i Služba za imovinsko - pravne, geodetske poslove i katastar nekretnina da, u cilju realizacije ove odluke, odmah pristupi formiranju parcela na zemljištu iz člana 1. ove odluke, u svrhu izgradnje stambenih objekata čija ukupna površina ne može biti veća od 500 m².

Član 3.

(1) Prenos prava vlasništva nad parcelama, koje će se formirati shodno članu 2. ove odluke, izvršit će se u korist slijedećih lica:

1. Adilović Amra – Gornja Vraca,
2. Hazić Hatidža – Kolići
3. Hazić Hidajet – Kolići,
4. Isaković Fehim – Orahovica,
5. Spahić Abdulah – Kovačevići,
6. Tufekčić Šaban – Spahići i
7. Halilović Muhamed – Smajići.

(2) Lica iz stava (1) ovog člana jesu lica pogođena poplavama i klizištima iz maja i avgusta mjeseca 2014. godine, u teškim materijalnim prilikama, koja usljed bolesti, nezaposlenosti, mnogočlanih domaćinstava nisu u prilici da iz vlastitih sredstava obezbijede parcele za svoje stambeno zbrinjavanje, iz kojih razloga su izabrana u projektu oporavka od navedenih nesreća iz Razvojnog programa, koji „UNDP-a“ i „Arbeiter Samariter Bund ASB“ realizuju u saradnji sa Gradom Zenica.

Član 4.

Lica iz člana 3. stav (1) ove odluke oslobađaju se od obaveza plaćanja naknada za zemljište (pogodnost lokacije, uređenje zemljišta i slično), naknada za izdavanje urbanističkih saglasnosti, građevinskih i upotrebnih dozovla, te troškove tehničkog prijema, kao i drugih troškova potrebnih za upis prava vlasništva na parcelama dodijeljenim u skladu s ovom odlukom.

Član 5.

Gradsko vijeće ovlašćuje Gradonačelnika Grada Zenica da sa svakim pojedinačnim licem iz člana 3. stav (1) ove odluke zaključi valjan ugovor o prenosu prava vlasništva nad dodijeljenim parcelama građevinskog zemljišta iz člana 1. ove odluke.

Član 6.

Prenos prava vlasništva nad nekretninama iz ove odluke vrši se bez naknade.

Član 7.

Ova odluka stupa na snagu danom donošenja iste i ima se objaviti u „Službenim novinama Grada Zenica“.

Broj: 01-01-4549/18
Zenica, 05.11.2018. godine

*PREDSJEDAVALAČI
GRADSKOG VIJEĆA ZENICA
Goran Bulajić, s.r.*

165.

Na osnovu člana 21. tačka 26), a u vezi sa odredbama članova 73. i 78. stav (1) Statuta Grada Zenica („Službene novine Grada Zenica”; broj 5/15), člana 12. Odluke o organizaciji mjesne samouprave („Službene novine općine Zenica”, broj: 5/15) i člana 37. Poslovnika Gradskog vijeća („Službene novine Grada Zenica”, broj: 4/17), Gradsko vijeće Zenica, na 29. sjednici održanoj 18. oktobra 2018. godine, donosi

ODLUKU

o dodjeli mandata kandidatu za predsjednika Savjeta MZ “Klopče”

Član 1.

Ibrahimu Omiću, dodjeljuje se mandat predsjednika Savjeta MZ “Klopče”, kao sljedećem kandidatu s najvećim brojem osvojenih glasova na kandidatskoj listi.

Član 2.

Ova odluka stupa na snagu danom donošenja i objavit će se u “Službenim novinama Grada Zenica”.

Broj: 01-01-3098/18
Zenica, 18.10. 2018. godine

*PREDSJEDAVALAČI
GRADSKOG VIJEĆA ZENICA
Goran Bulajić, s.r.*

166.

Na osnovu člana 21. tačka 26) i 73. stav (2) Statuta Grada Zenica („Službene novine Grada Zenica”; broj 5/15), člana 12. Odluke o organizaciji mjesne samouprave („Službene novine općine Zenica”, broj: 5/15) i člana 37. Poslovnika Gradskog vijeća („Službene novine Grada Zenica”, broj: 4/17), Gradsko vijeće Zenica, na 29. sjednici održanoj 18. oktobra 2018. godine, donosi

ODLUKU

o dodjeli mandata kandidatu za člana Savjeta MZ “Klopče”

Član 1.

Admiru Hrustiću, dodjeljuje se mandat člana Savjeta MZ “Klopče”, kao sljedećem kandidatu s

najvećim brojem osvojenih glasova na kandidatskoj listi po teritorijalnom principu.

Član 2.

Ova odluka stupa na snagu danom donošenja i objavit će se u "Službenim novinama Grada Zenica".

Broj: 01-01-3096/18

Zenica, 18. 10. 2018. godine

*PREDSJEDAVAJUĆI
GRADSKOG VIJEĆA ZENICA
Goran Bulajić, s.r.*

167.

Na osnovu člana 21. tačka 26) i 73. Statuta Grada Zenica ("Službene novine Grada Zenica"; broj 5/15) i člana 45. Poslovnika Gradskog vijeća ("Službene novine Grada Zenica", broj: 4/17), Gradsko vijeće Zenica, na 29. sjednici održanoj 18. oktobra 2018. godine, donosi

RJEŠENJE

o razrješenju dužnosti predsjednika Savjeta MZ "Klopče"

Član 1.

Ernas Pašalić, razrješava se dužnosti predsjednika Savjeta MZ "Klopče", zbog podnošenja ostavke na funkciju predsjednika Savjeta MZ "Klopče".

Član 2.

Ovo rješenje stupa na snagu danom donošenja i objavit će se u "Službenim novinama Grada Zenica".

Broj: 01-01-3100/18

Zenica, 18. 10. 2018. godine

*PREDSJEDAVAJUĆI
GRADSKOG VIJEĆA ZENICA
Goran Bulajić, s.r.*

168.

Na osnovu člana 21. tačka 26) i 73. Statuta Grada Zenica ("Službene novine Grada Zenica"; broj 5/15) i člana 45. Poslovnika Gradskog vijeća ("Službene novine Grada Zenica", broj: 4/17), Gradsko vijeće Zenica, na 29. sjednici održanoj 18. oktobra 2018. godine, donosi

RJEŠENJE

o razrješenju dužnosti člana Savjeta MZ "Klopče"

Član 1.

Selver Hrustić, razrješava se dužnosti člana Savjeta MZ "Klopče", zbog podnošenja ostavke na funkciju člana Savjeta MZ "Klopče".

Član 2.

Ovo rješenje stupa na snagu danom donošenja i objavit će se u "Službenim novinama Grada Zenica".

Broj: 01-01-3101/18

Zenica, 18.10. 2018. godine

*PREDSJEDAVAJUĆI
GRADSKOG VIJEĆA ZENICA
Goran Bulajić, s.r.*

GRADONAČELNIK

169.

Na osnovu člana 13. stav (l) alineja 10. i člana 119. stav (2) alineja 11. Zakona o zdravstvenoj zaštiti (Službene novine FBiH", broj: 46/10 i 75/13), člana 10. stav (1) tačka 5) Zakona o zaštiti stanovništva od zaraznih bolesti Federacije BiH ("Službene novine FBiH", broj: 29/05) i Naredbe o provođenju obavezne preventivne sistematske deratizacije, dezinfekcije i dezinsekcije na području Zeničko-dobojskog kantona - jesenja faza 2018. godine br.: 11-37- 6951-1-1/18 i člana 34. stav (1) tačka 6) Statuta Grada Zenica ("Službene novine Grada Zenica", broj: 5/15), Gradonačelnik, donosi

NAREDBU

o provođenju obavezne preventivne sistematske deratizacije, dezinfekcije i dezinsekcije na području Grada Zenica - jesenja faza 2018. godine

Obavezna preventivna sistematska deratizacija, dezinfekcija i dezinskcija na području Grada Zenica - jesenja faza 2018. godine, provest će se u periodu od 22.10. do 16.11.2018 godine.

II

Obaveznu preventivnu sistematsku deratizaciju, dezinfekciju i dezinskciju će organizovati i sprovesti, prema ovjerenom rasporedu, ugovorni organ Grada Zenica izabran za obavljanje navedenih poslova prema Zakonu o javnim nabavkama .

III

Stručni nadzor nad provođenjem preventivne sistematske deratizacije na površinama i objektima, obaviti će Higijensko - epidemiološka služba JU "Dom zdravlja" Zenica, a kontrolu izvođenja akcije na području Grada Zenica će provoditi gradski sanitarni inspektori imenovani Rješenjem Gradonačelnika.

IV

Obaveznom preventivnom sistematskom deratizacijom će biti obuhvaćeni sljedeći objekti i površine:

1. Javne i zelene površine u pojasu naselja sa koncentrisanim stanovništvom (gradska naselja)
2. obale površinskih vodotokova u gradskim i prigradskim zonama
3. centralne deponije
4. nezvanična (neorganizovana) odlagališta otpada - smetlišta
5. vaspitno - obrazovni objekti (škole, obdaništa, fakulteti) i kulturni objekti sa pripadajućim vanjskim površinama
6. kolektivni centri za smještaj i boravak izbjeglih i prognanih lica
7. objekti kantonalnih javnih zdravstvenih ustanova sa pripadajućim vanjskim površinama
8. objekti gradskih/općinskih javnih zdravstvenih ustanova sa pripadajućim vanjskim površinama
9. kantonalne institucije i njihove ispostave sa pripadajućim vanjskim površinama
10. gradske/općinske institucije i njihove ispostave sa pripadajućim vanjskim površinama
11. individualni stambeni objekti u privatnom vlasništvu u užim zonama gradskih naselja

12. vjerski objekti i.groblja u gradskim naseljima

13. objekti za javno vodosnabdijevanje i kanalizaciona mreža sa šahtovima i izlivnim kolektorima

14. objekti i površine svih fizičkih i pravnih lica koja obavljaju poslovnu djelatnost

15. objekti i sredstva javnog saobraćaja

16. objekti za proizvodnju i promet živežnih namirnica i predmeta opće upotrebe sa pripadajućim vanjskim površinama

17. zajednički prostori stambenih zgrada (podrumi itavani).

V

Troškove obavezne preventivne sistematske deratizacije iz tačke IV pod rednim brojem 1. 4. 8.10. i 11. snosi Grad Zenica iz budžeta, a troškove pod rednim brojevima 2.5.6.9. i 12. snosi Kanton, dok pravna i fizička lica, vlasnici ili korisnici-prostora i površina koje podliježu obaveznoj preventivnoj sistematskoj deratizaciji snose troškove pod rednim brojevima 3. 13.14. 15. 16.17. i 18. Pravna i fizička lica, vlasnici ili korisnici prostora i površina koje podliježu obaveznoj preventivnoj sistematskoj deratizaciji obavezni su istu organizovati i provesti isključivo u utvrđenom periodu.

VI

Obavezi provođenja preventivne sistematske deratizacije podliježu svi subjekti naznačeni u ovoj Naredbi. Navedeni subjekti su dužni obezbijediti nesmetan rad izvođačima. Subjekti koji ne budu poštovali obaveze iz Naredbe će biti sankcionisani prema važećim propisima.

VII

Deratizacija se ima obaviti sa antikoagulantnim rodenticidima druge generacije u skladu sa Pravilnikom o načinu obavljanja obavezne dezinfekcije, dezinskcije, deratizacije (Službene novine FBiH br. 30/16) i u skladu sa Pravilnikom o uslovima u pogledu stručne spreme zaposlenika, tehničke opremljenosti prostorija i drugih uslova kojima moraju udovoljavati zdravstvene ustanove, privredna društva odnosno fizičke osobe -obrtnici za obavljanje dezinfekcije, dezinskcije i deratizacije (Službene novine FBiH br. 30/16).

VI

Obavezna preventivna sistematska deratizacija se ima provesti u skladu sa Programom provođenja obavezne preventivne sistematske deratizacije na području Zeničko-dobojskog kantona za 2018. godinu

IX

Naredba stupa na snagu danom donošenja, a objavit će se u "Službenim novinama Grada Zenica" i putem sredstava informisanja.

Broj: 02-14-8270-6/18-1

Zenica, 10.10.2018. godine

GRADONAČELNIK
Fuad Kasumović, s.r.

170.

Na osnovu člana 16. stav (3) Zakona o privrednim društvima ("Službene novine FBiH", broj: 81/15) i člana 34. tačka 6) Statuta Grada Zenica ("Službene novine Grada Zenica", broj: 5/15) Gradonačelnik, donosi

ZAKLJUČAK

o odobravanju korištenja imena Grada Zenica u nazivu Društva sa ograničenom odgovornošću

I

Odobrava se korištenje imena Grada "Zenica" u nazivu Društva sa ograničenom odgovornošću. Poslovno ime društva će biti "Toplana Zenica" d.o.o. sa sjedištem na adresi Bulevar kralja Tvrtka I, broj 17, Zenica.

II

Ovaj zaključak stupa na snagu danom donošenja, a objavit će se u "Službenim novinama Grada Zenica"

Broj: 02-49-1560/18

Zenica, 27.09.2018. godine

GRADONAČELNIK
Fuad Kasumović, s.r.

171.

Na osnovu člana 60. i 61. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica ("Službene novine Grada Zenica", broj: 5/15) i člana 26. Odluke o izvršavanju Budžeta Grada Zenica za 2018. godinu ("Službene novine Grada Zenica", broj: 7/18), Gradonačelnik Zenice, donosi

ZAKLJUČAK

o odobravanju izdvajanja sredstava iz tekuće budžetske rezerve

I

Medžlisu Islamske zajednice Zenica odobrava se izdvajanje novčanih sredstava iz Budžeta Grada Zenica za 2018. godinu u iznosu od 5.000,00 KM, a u svrhu adaptacije mektebske učionice u džamiji Klopče.

II

Sredstva iz tačke I izdvajaju se iz "Tekuće budžetske rezerve" Budžeta Grada Zenica za 2018. godinu, a u svrhu obezbjeđenja nedostajućih sredstava kod Službe za boračko-invalidsku i socijalnu zaštitu, stambene poslove i društvene djelatnosti – organizacioni kod 38010001, ekonomski kod 614300 – tekući transferi neprofitnim organizacijama, funkcija 0861.

III

Za realizaciju ovog zaključka zadužuje se Služba za boračko-invalidsku i socijalnu zaštitu, stambene poslove i društvene djelatnosti i Služba za finansije, koja će navedena sredstva uplatiti na račun Medžlisa Islamske zajednice Zenica, broj: 134-010-00001154-53 otvoren kod ASA banke d.d. Sarajevo, sa naznakom "za džemat Klopče".

IV

O utrošku sredstava korisnik je dužan podnijeti izvještaj Službi za boračko-invalidsku i socijalnu zaštitu, stambene poslove i društvene djelatnosti.

V

Ovaj zaključak stupa na snagu danom donošenja, a objavit će se u "Službenim novinama Grada Zenica".

Broj: 02-14-1482/18

Zenica, 27.09.2018. godine

GRADONAČELNIK
Fuad Kasumović, s.r.

172.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 9/15, 102/15, 104/16 i 5/18), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2018. godinu ("Službene novine Grada Zenica", broj: 7/18) i Uputstva Općine Zenica o prestrukturiranju i preraspodjeli odobrenih budžetskih sredstava, broj: 02-14-20277/13 od 13.11.2013. godine, na prijedlog Službe za opću upravu, Gradonačelnik Zenice, donosi

ZAKLJUČAK

o preraspodjeli sredstava u Budžetu Grada Zenica za 2018. godinu

I

Odobrava se preraspodjela sredstava Budžeta Grada Zenica za 2018. Godinu ("Službene novine Grada Zenica", broj 1/18 i 7/18) na organizacionom kodu 41010001 – Služba za opću upravu.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613900, funkcija 0111, budžetska pozicija 271 - "Ugovorene i druge posebne usluge" za iznos od 1.200 KM

Povećava se:

- ekonomski kod 613100, funkcija 0111, budžetska pozicija 267 - "Putni troškovi" za iznos od 1.200 KM

III

Za realizaciju ovog zaključka zadužuju se Služba za opću upravu i Služba za finansije.

IV

Ovaj zaključak stupa na snagu danom donošenja, a objavit će se u "Službenim novinama Grada Zenica".

Broj: 02-14-1524/2018
Zenica, 27.09.2018.

GRADONAČELNIK
Fuad Kasumović, s.r.

173.

Na osnovu člana 34. Statuta Grada Zenica ("Službene novine Grada Zenica", broj: 5/15) i člana 23. Odluke o izvršavanju Budžeta Grada Zenica za 2018. godinu ("Službene novine Grada Zenica", broj: 7/18) na prijedlog Službe za finansije i Službe za privredu i upravljanje razvojem, Gradonačelnik Zenice, donosi

ZAKLJUČAK

o uvećanju sredstava u Budžetu Grada Zenica za 2018. godinu

I

Odobrava se uvećanje sredstava u Budžetu Grada Zenica za 2018. godinu ("Službene novine Grada Zenica", broj 1/18 i 7/18) u iznosu od 150.000,00 KM na organizacionom kodu 48010001 – Služba za privredu i upravljanje razvojem, a u skladu sa Odlukom Vlade Zeničko-dobojskog kantona o odobravanju finansijskih sredstava – subvencioniranje troškova organizacije i izgradnje poslovnih zona na području Zeničko-dobojskog kantona, broj: 02-14-12824/18 od 13.08.2018. godine, te Ugovorom o regulisanju međusobnih obaveza i načina realizacije odobrenih sredstava za pripremu i izgradnju poslovne zone, broj: 04-14-12824-9/18 od 12.09.2018. godine.

II

Uvećanje sredstava u Budžetu Grada Zenica za 2018. godinu iz tačke I vrši se na sljedeći način:

a) u dijelu A - 2 PRIHODI I PRIMICI:

- formira se nova budžetska pozicija 90C - "Primljeni kapitalni transferi od kantona (izgradnja komunalne infrastrukture u Poslovnoj zoni "Zenica 1")", ekonomski kod 742114, u iznosu od 150.000,00 KM.

Nakon uvećanja UKUPNO PRIHODI I PRIMICI BUDŽETA iznose 52.906.915,78 KM, a UKUPNO PRIHODI I PRIMICI BUDŽETA SA SUFICITOM IZ PRETHODNE GODINE iznose 56.151.115,17 KM.

b) u dijelu B - 2 POSEBANDIO-RASHODI I IZDACI PO BUDŽETSKIM KORISNICIMA

- na organizacionom kodu 48010001
- Služba za privredu i upravljanje razvojem, formira se nova budžetska pozicija 356A -

“Rekonstrukcija i investiciono održavanje (izgradnja komunalne infrastrukture u Poslovnoj zoni “Zenica 1”) - kanton”, ekonomski kod 821600, funkcija 0623, u iznosu od 150.000,00 KM.

Nakon uvećanja UKUPNO RASHODI I IZDACI BUDŽETA iznose 52.906.915,78 KM, a UKUPNO RASHODI I IZDACI BUDŽETA SA RASPOREDOM SUFICITA iznose 56.151.115,17 KM.

III

Za realizaciju ovog zaključka zadužuju se Služba za privredu i upravljanje razvojem i Služba za finansije.

IV

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-2131/18

Zenica, 12.10.2018. godine

GRADONAČELNIK
Fuad Kasumović, s.r.

174.

Na osnovu člana 59. Zakona o budžetima u FBiH (“Službene novine FBiH”, broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica (“Službene novine Grada Zenica”, broj: 5/15), člana 28. Odluke o izvršavanju Budžeta Grada Zenica za 2018. godinu (“Službene novine Grada Zenica”, broj: 7/18) i Uputstva Općine Zenica o prestrukturiranju i preraspodjeli odobrenih budžetskih sredstava, broj: 02-14-20277/13 od 13.11.2013. godine, na prijedlog Službe za ekologiju, komunalne i inspeksijske poslove, Gradonačelnik Zenice, donosi

ZAKLJUČAK

o preraspodjeli sredstava u Budžetu Grada Zenica za 2018. godinu

I

Odobrava se preraspodjela sredstava Budžeta Grada Zenica za 2018. godinu (“Službene novine Grada Zenica”, broj: 1/18 i 7/18) na organizacionom

kodu 40010001 – Služba za ekologiju, komunalne i inspeksijske poslove.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613900, funkcija 0563, budžetska pozicija 258 - “Ostale ugovorene usluge” za iznos od 2.500,00 KM.

Povećava se:

- ekonomski kod 614300, funkcija 0161, budžetska pozicija 260 - “Tekući transferi neprofitnim organizacijama” za iznos od 2.500,00 KM.

III

Za realizaciju ovog zaključka zadužuju se Služba za ekologiju, komunalne i inspeksijske poslove i Služba za finansije.

IV

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-2382/18

Zenica, 16.10.2018. godine

GRADONAČELNIK
Fuad Kasumović, s.r.

175.

Na osnovu člana 59. Zakona o budžetima u FBiH (“Službene novine FBiH”, broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica (“Službene novine Grada Zenica”, broj: 5/15), člana 28. Odluke o izvršavanju Budžeta Grada Zenica za 2018. godinu (“Službene novine Grada Zenica”, broj: 7/18) i Uputstva Općine Zenica o prestrukturiranju i preraspodjeli odobrenih budžetskih sredstava, broj: 02-14-20277/13 od 13.11.2013. godine, na prijedlog Službe kabineta Gradonačelnika, Gradonačelnik Zenice, donosi

ZAKLJUČAK

o preraspodjeli sredstava u Budžetu Grada Zenica za 2018. godinu

I

Odobrava se preraspodjela sredstava Budžeta Grada Zenica za 2018. godinu ("Službene novine Grada Zenica", broj: 1/18 i 7/18) na organizacionom kodu 32010001 – Služba kabineta Gradonačelnika.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613200, funkcija 0111, budžetska pozicija 20B - "Izdaci za energiju" (*električna energija i grijanje*) za iznos od 8.000,00 KM
- ekonomski kod 613300, funkcija 0111, budžetska pozicija 20C - "Izdaci za komunikaciju i komunalne usluge" (*izdaci za IP Centrex telefonski sistem, ViK, internet i sl.*) za iznos od 10.000,00 KM.

Povećava se:

- ekonomski kod 613400, funkcija 0111, budžetska pozicija 018 - "Nabavka materijala i sitnog inventara" za iznos od 2.000,00 KM i
- ekonomski kod 611200, funkcija 0112, budžetska pozicija 20A - "Naknade troškova zaposlenih" (*otpremnine, naknade u slučaju teške bolesti i dr.*) za iznos od 16.000,00 KM.

III

Za realizaciju ovog zaključka zadužuju se Služba kabineta Gradonačelnika i Služba za finansije.

IV

Ovaj zaključak stupa na snagu danom donošenja, a objavit će se u "Službenim novinama Grada Zenica".

Broj: 02-14-2810/18

Zenica, 25.10.2018. godine

GRADONAČELNIK
Fuad Kasumović, s.r.

176.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2018. godinu ("Službene novine Grada Zenica", broj: 7/18) i Uputstva Općine Zenica o prestrukturiranju i preraspodjeli odobrenih budžetskih sredstava, broj: 02-14-20277/13 od 13.11.2013. godine, na prijedlog Službe za boračko-invalidsku i socijalnu zaštitu, stambene poslove i društvene djelatnosti, Gradonačelnik Zenice, donosi

ZAKLJUČAK**o preraspodjeli sredstava u Budžetu Grada Zenica za 2018. godinu****I**

Odobrava se preraspodjela sredstava Budžeta Grada Zenica za 2018. godinu ("Službene novine Grada Zenica", broj: 1/18 i 7/18) na organizacionom kodu 38010001 – Službe za boračko-invalidsku i socijalnu zaštitu, stambene poslove i društvene djelatnosti.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 821200, funkcija 1091, budžetska pozicija 137 - "Izgradnja stambenih objekata za porodice u stanju socijalne potrebe" za iznos od 50.000,00 KM.

Povećava se:

- ekonomski kod 821200, funkcija 0812, budžetska pozicija 141 - "Izgradnja i uređenje igrališta i sportskih terena" za iznos od 50.000,00 KM.

III

Za realizaciju ovog zaključka zadužuju se Služba za boračko-invalidsku i socijalnu zaštitu, stambene poslove i društvene djelatnosti i Služba za finansije.

IV

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-2902/18

Zenica, 26.10.2018.godine

*GRADONAČELNIK
Fuad Kasumović, s.r.*

177.

Na osnovu člana 60. i 61. Zakona o budžetima u FBiH (“Službene novine FBiH” broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica (“Službene novine Grada Zenica” broj: 5/15) i člana 26. Odluke o izvršavanju Budžeta Grada Zenica za 2018. godinu (“Službene novine Grada Zenica” broj: 7/18), Gradonačelnik Zenice, donosi

ZAKLJUČAK**o odobravanju izdvajanja sredstava iz tekuće budžetske rezerve**

I

Javnom preduzeću “RTV Zenica” d.o.o. Zenica odobrava se izdvajanje novčanih sredstava iz Budžeta Grada Zenica za 2018. godinu u iznosu od 45.000,00 KM, a u svrhu nabavke opreme za tehničko-tehnološko unapređenje sredstava za rad Javnog preduzeća.

II

Sredstva iz tačke I izdvajaju se iz “Tekuće budžetske rezerve” Budžeta Grada Zenica za 2018. godinu, a u svrhu obezbjeđenja nedostajućih sredstava kod Službe za boračko-invalidsku i socijalnu zaštitu, stambene poslove i društvene djelatnosti – organizacioni kod 38010001, ekonomski kod 615400 – kapitalni transferi javnim preduzećima, funkcija 0831.

III

Za realizaciju ovog zaključka zadužuje se Služba za boračko-invalidsku i socijalnu zaštitu, stambene poslove i društvene djelatnosti i Služba za finansije, koja će navedena sredstva uplatiti na račun JP “RTV Zenica”, broj: 141-355-53200201-81 otvoren kod BBI banke.

IV

O utrošku sredstava korisnik je dužan podnijeti izvještaj Službi za boračko-invalidsku i socijalnu zaštitu, stambene poslove i društvene djelatnosti.

V

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-3220/18

Zenica, 31.10.2018. godine

*GRADONAČELNIK
Fuad Kasumović, s.r.*

178.

Na osnovu člana 59. Zakona o budžetima u FBiH (“Službene novine FBiH”, broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica (“Službene novine Grada Zenica”, broj: 5/15), člana 28. Odluke o izvršavanju Budžeta Grada Zenica za 2018. godinu (“Službene novine Grada Zenica”, broj 7/18) i Uputstva Općine Zenica o prestrukturiranju i preraspodjeli odobrenih budžetskih sredstava, broj: 02-14-20277/13 od 13.11.2013. godine, na prijedlog Službe za boračko-invalidsku i socijalnu zaštitu, stambene poslove i društvene djelatnosti, Gradonačelnik Zenice, donosi

ZAKLJUČAK**o preraspodjeli sredstava u Budžetu Grada Zenica za 2018. godinu**

I

Odobrava se preraspodjela sredstava Budžeta Grada Zenica za 2018. godinu (“Službene novine Grada Zenica”, broj: 1/18 i 7/18) na organizacionom kodu 38010001 – Službe za boračko-invalidsku i socijalnu zaštitu, stambene poslove i društvene djelatnosti.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613300, funkcija 0561, budžetska pozicija 102 - “Izdaci za

deratizaciju” za iznos od 12.500,00KM i ekonomski kod 614300, funkcija 0761, budžetska pozicija 115 - “Tekući transferi za zdravstvo” za iznos od 10.000,00KM.

Povećava se:

- ekonomski kod 613300, funkcija 0621, budžetska pozicija 103 - “Održavanje zelenih površina sportskih igrališta” za iznos od 22.500,00KM.

III

Za realizaciju ovog zaključka zadužuju se Služba za boračko-invalidsku i socijalnu zaštitu, stambene poslove i društvene djelatnosti i Služba za finansije.

IV

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-3221/18

Zenica, 31.10.2018.godine

GRADONAČELNIK
Fuad Kasumović, s.r.

179.

Na osnovu člana 60. i 61. Zakona o budžetima u FBiH (“Službene novine FBiH” broj: 102/13, 9/14, 13/14, 8/15, 91/15, 102/15, 104/16 i 5/18), člana 34. Statuta Grada Zenica (“Službene novine Grada Zenica” broj: 5/15) i člana 26. Odluke o izvršavanju Budžeta Grada Zenica za 2018. godinu (“Službene novine Grada Zenica” broj: 7/18), Gradonačelnik Zenice, donosi

ZAKLJUČAK

o odobravanju izdvajanja sredstava iz tekuće budžetske rezerve

I

Kovač Almedini, zakonskoj zastupnici mlđb. Nedima Kovača (sin Kenana) iz Zenice, odobrava se izdvajanje novčanih sredstava iz Budžeta Grada Zenica za 2018. godinu u iznosu od 1.860,00 KM za izmirenje obaveza po Sporazumu o vansudskoj nagodbi, broj: 1/18 od 17.10.2018. godine.

II

Sredstva iz tačke I izdvajaju se iz “Tekuće budžetske rezerve” Budžeta Grada Zenica za 2018. godinu, a u svrhu obezbjeđenja nedostajućih sredstava na organizacionom kodu 31010001 - Gradonačelnik, ekonomski kod 614800 – drugi tekući rashodi, funkcija 0111.

III

Za realizaciju ovog zaključka zadužuje se Služba za finansije, koja će navedena sredstva uplatiti na račun punomoćnika tražioca izvršenja - Hadžimahmutović Tarika, advokata iz Zenice, broj: 134-010-00003871-50 otvoren kod ASA banke d.d. Sarajevo.

IV

Ovaj zaključak stupa na snagu danom donošenja, a objavit će se u “Službenim novinama Grada Zenica”.

Broj: 02-14-3218/18

Zenica, 31.10.2018. godine

GRADONAČELNIK
Fuad Kasumović, s.r.

JP “PARKING SERVIS” D.O.O. ZENICA

180.

Na osnovu člana 6. Zakona o javnim preduzećima u Federaciji Bosne i Hercegovine (“Službene novine Federacije BiH”, broj: 8/05, 81/08, 22/09 i 109/12) i člana 337. stav (6) u vezi sa članom 310. Zakona o privrednim društvima (“Službene novine Federacije BiH”, broj: 81/15), Gradonačelnik Zenice, vršeći ovlaštenje Skupštine JAVNOG PREDUZEĆA “PARKING SERVIS” d.o.o. ZENICA, donosi:

STATUT

JP “Parking servis” d.o.o. Zenica

DIO PRVI - OPŠTE ODREDBE

Član 1.

Statutom Javnog preduzeća “Parking servis” d.o.o. Zenica (u daljem tekstu: Društvo) uređuju se:

- a) firma i sjedište Društva
- b) djelatnost Društva

- c) iznos osnovnog kapitala i visina udjela svakog člana i način promjene visine osnovnog kapitala
- d) vođenje poslovanja i zastupanje Društva
- e) način utvrđivanja, podjele dobiti i pokrića gubitka
- f) prava i obaveze članova
- g) organizacija društva
- h) upravljanje i način donošenja odluka, sastav, način imenovanja i razrješenja, ovlaštenja i odgovornosti organa društva
- i) način informisanja članova o poslovanju društva i vođenju knjige udjela
- j) primjena Etičkog kodeksa
- k) postupci nabavke
- l) planiranje poslovanja
- m) rezerve Društva
- n) način pristupanja društvu i prestanak članstva u društvu
- o) poslovna tajna
- p) prestanak društva
- r) postupak izmjena i dopuna statuta
- s) druga pitanja u skladu sa zakonom.

Član 2.

Društvo je osnovano odlukom Vijeća Općine Zenica i registrovano u skladu sa važećim propisima kod Kantonalnog suda u Zenici dana 31. 12. 2001. godine, rješenjem broj: U/I-2188/01, pod matičnim registarskim brojem 1-8478.

Član 3.

JAVNO PREDUZEĆE „PARKING SERVIS“ d.o.o. ZENICA je pravno lice koje samostalno obavlja djelatnost upisanu u registar društava radi sticanja dobiti, obavljanja djelatnosti od opšteg interesa.

Član 4.

(1) Društvo može osnovati poslovne jedinice koje će imati ovlaštenja u pravnom prometu kao i poseban obračun rezultata poslovanja i poseban podračun u skladu sa važećim propisima.

(2) Poslovne jedinice Društva, osnovane u cilju efikasnijeg poslovanja istog, nemaju svojstvo pravnog lica.

(3) Poslovne jedinice Društva upisuju se u registar društava prema sjedištu Društva, saglasno važećim propisima o registraciji društava.

Član 5.

Osnivači i lica koja sticanjem udjela u Društvu stupe u isto jesu članovi Društva.

Član 6.

(1) Društvo je dužno da posluje u skladu sa zakonom, dobrim poslovnim običajima i poslovnim moralom.

(2) Društvo može da zaključuje ugovore i obavlja druge poslove u pravnom prometu roba i usluga samo u okviru djelatnosti upisanih u registar društava.

(3) Društvo može obavljati i druge poslove koji se uobičajeno obavljaju uz djelatnosti upisane u registar Društava u obimu i na način koji su potrebni za poslovanje, a ne predstavljaju obavljanje tih poslova kao redovne djelatnosti.

DIO DRUGI- FIRMA, SJEDIŠTE I PEČAT DRUŠTVA

Član 7.

(1) Firma je ime pod kojim Društvo posluje.

- Puna firma Društva je: JAVNO PREDUZEĆE „PARKING SERVIS“ d.o.o. ZENICA

- Skraćena firma Društva je: JP „Parking servis“ d.o.o. Zenica.

(2) U svom poslovanju Društvo će koristiti firmu u obliku, punom ili skraćenom, u kome je isto upisano u registar društava.

(3) Podružnica Društva koja ima određena ovlaštenja u pravnom prometu istupa pod firmom Društva te naznakom da se radi o dijelu istog.

Član 8.

(1) Sjedište Društva je u Zenici, u ulici Muhameda Seida Serdarevića broj 1.

(2) Društvo može mijenjati firmu i sjedište kada se za to steknu određeni uslovi.

(3) Odluku o promjeni firme i sjedišta Društva donosi Skupština Društva.

Član 9.

(1) Društvo ima pečat i i štambilj.

(2) Pečat Društva je okruglog oblika, prečnika 30 mm i isti sadrži punu firmu Društva pod kojom ono posluje.

(3) Štambilj Društva je pravougaonog oblika veličine 50 mm x 25 mm sa utisnutom firmom, sjedištem i administrativnim podacima (broj akta iz protokola, datum i prilozi).

Način upotrebe pečata i štambilja, čuvanje i rukovanje istim, svojom odlukom određuje Uprava, odnosno direktor Društva.

DIO TREĆI- DJELATNOSTI DRUŠTVA**Član 10.**

U skladu sa Odlukom o klasifikaciji djelatnosti Bosne i Hercegovine djelatnosti Društva su:

22.11 Proizvodnja vanjskih i unutrašnjih guma za vozila; projektiranje vanjskih guma za vozila

43.12 Pripremni radovi na gradilištu

43.21 Elektroinstalacijski radovi

43.22 Uvođenje instalacija vodovoda, kanalizacije i plina i instalacije za grijanje i klimatizaciju

43.29 Ostali građevinski instalacijski radovi

43.31 Fasadni i štukatorski radovi

43.33 Postavljanje podnih i zidnih obloga

43.34 Bojenje i staklarski radovi

43.39 Ostali završni građevinski radovi

43.99 Ostale specijalizirane građevinske djelatnosti, d.n

45.20 Održavanje i popravak motornih vozila

49.41 Cestovni prijevoz robe

49.42 Usluge preseljenja

52.10 Skladištenje robe

52.21 Uslužne djelatnosti u vezi s kopnenim prijevozom

52.29 Ostale pomoćne djelatnosti u prijevozu

68.20 Iznajmljivanje i upravljanje vlastitim nekretninama ili nekretninama uzetom u zakup (leasing)

68.32 Upravljanje nekretninama uz naknadu ili na osnovi ugovora

73.11 Agencija za promidžbu (reklamu i propagandu)

73.12 Oglašavanje preko medija

81.10 Pomoćne djelatnosti upravljanja zgradama

81.21 Osnovno čišćenje zgrada

81.22 Ostale djelatnosti čišćenja zgrada i objekata

81.30 Uslužne djelatnosti uređenja i održavanje zelenih površina

96.09 Ostale lične uslužne djelatnosti, d.n.

Član 11.

Društvo će obavljati vanjskotrgovinski promet, i to:

- vanjska trgovina neprehrambenim proizvodima uvoz – izvoz.

Član 12.

Skupština Društva može posebnom odlukom mijenjati djelatnosti i poslove vanjskotrgovinskog prometa Društva.

Član 13.

Budući da Društvo obavlja djelatnosti od opšteg interesa i to zadovoljavanje potreba građana za parkiralištima i drugih potreba u Grada Zenica, može biti registrovano samo za obavljanje djelatnosti koje su direktno vezane za te djelatnosti, odnosno one koje bi direktno ili objektivno mogle biti od koristi Društvu, među ostalim, i značajnim poboljšanjem ključnih kapaciteta ili finansijskih rezultata Društva u cjelini.

DIO ČETVRTI - IZNOS OSNOVNOG KAPITALA I VISINA UDJELA ČLANOVA I PRAVA IZ UDJELA**Član 14.**

Osnovni kapital Društva iznosi 10.000,00 KM (slovima: deset hiljada konvertibilnih maraka) i isti je u cjelosti 100% vlasništvo osnivača Grada Zenica.

Član 15.

(1) Osnovni kapital u Društvu može se povećati na osnovu odluke Skupštine, uplatom ili unošenjem novih uloga.

(2) Osnovni kapital društva ne može se smanjivati ispod iznosa utvrđenog Zakonom o privrednim društvima.

(3) Odluku o smanjivanju osnovnog kapitala Društva donosi osnivač Društva u skladu sa Zakonom o privrednim društvima.

Član 16.

(1) Članovi Društva mogu dio svog osnovnog kapitala prenijeti i na drugo lice, mogu dozvoliti drugim licima unošenje novog kapitala, a radi povećanja osnovnog kapitala Društva.

(2) Udjeli u Društvu su prenosivi.

(3) Prenos udjela vrši se ugovorom i nasljeđivanjem.

Član 17.

(1) Uprava Društva dužna je voditi knjigu udjela tako da se može osigurati tačna i potpuna evidencija o članovima društva, njihovim udjelima.

(2) U knjigu udjela iz prethodnog stava se obavezno unosi:

- a) ime i prezime, ili firma i adresa prebivališta ili sjedište člana Društva,
- b) vrsta i iznos ugovorenog uloga i uplaćeni iznos,
- c) posebna prava i obaveze vezane za udio.

Član 18.

Udjel u društvu daje pravo na učešće u upravljanju Društvom, pravo na učešće u dobiti kao i pravo na dio likvidacione mase.

Član 19.

Svaki udjel daje pravo glasa srazmjerno njegovoj nominalnoj vrijednosti.

DIO PETI - ORGANIZACIJA DRUŠTVA

Član 20.

- (1) Društvo posluje kao jedinstveni pravni subjekt.
- (2) Organizacija Društva zavisi od potreba efikasnog i svrsishodnog poslovanja i ostvarivanja cilja zbog kojeg je Društvo osnovano kao i dobiti.

Član 21.

(1) Društvo svoje poslovanje obavlja u sjedištu i van sjedišta Društva.

(2) Društvo može organizovati u sjedištu ili van

svog sjedišta, podružnice koje nemaju svojstvo pravnog lica ali se upisuju kao takve u registar društava jer obavljaju poslove iz redovne djelatnosti Društva te mogu sticati prava i preuzimati obaveze u ime i za račun Društva.

Odluku o osnivanju i ukidanju podružnice, djelokrug rada iste, imenovanju rukovodioca kao i o drugim pitanjima od značaja za poslovanje donosi Skupština.

DIO ŠESTI - UPRAVLJANJE I NAČIN DOKONČANJA ODLUKA; SASTAV; NAČIN IMENOVANJA I RAZRJEŠENJA, OVLAŠTENJA I ODGOVORNOSTI ORGANA DRUŠTVA

Član 22.

Organi Društva su:

- a) Skupština
- b) Nadzorni odbor
- c) Uprava
- d) Odbor za reviziju

Član 23.

(1) Društvo ima Skupštinu koju čine svi članovi Društva.

(2) Ukupan iznos osnovnog kapitala Društva predstavljen je u Skupštini sa 100 glasova, a član Društva ima broj glasova srazmjeran njegovom udjelu u osnovnom kapitalu Društva.

(3) U društvu sa ograničenom odgovornošću sa jednim članom ovlaštenja skupštine vrši član društva.

(4) Ovlaštenje Skupštine u ime Grada Zenice vrši gradonačelnik.

Član 24.

(1) Skupština Društva može biti redovna i vanredna.

(2) Redovna Skupština održava se jednom godišnje radi izjašnjavanja o godišnjem izvještaju Društva, koji uključuje finansijski izvještaj i izvještaj revizora, izvještaj Nadzornog odbora i Odbora za reviziju, te o drugim pitanjima iz nadležnosti Skupštine, a održava najkasnije 6 (šest) mjeseci od završetka poslovne godine.

(3) Vanredna Skupština se može održati u bilo koje vrijeme kada nije predviđeno izjašnjavanje o izvještajima iz prethodnog stava.

Član 25.

Skupštinu Društva je dužna Vijeću Grada Zenice podnijeti godišnji izvještaj o poslovanju Društva, koji uključuje finansijski izvještaj i izvještaj revizora, Nadzornog odbora i Odbora za reviziju.

Član 26.

(1) Skupštinu Društva saziva osnivač, Uprava Društva, Nadzorni odbor ili član Nadzornog odbora.

(2) Poziv za skupštinu dostavlja se najmanje 15 (petnaest) dana prije datuma održavanja skupštine, preporučenom pošiljkom, telefaksom ili elektronskom poštom.

(3) U pozivu se određuje dnevni red i dostavljaju materijali za svaku tačku dnevnog reda.

(4) Osnivač Društva ima pravo izvršiti dopunu dnevnog reda u roku od 8 (osam) dana od dana prijema poziva za skupštinu.

Član 27.

Poziv za vanrednu Skupštinu dostavlja se najmanje 5 (pet) dana prije datuma održavanja skupštine, preporučenom pošiljkom, telefaksom ili elektronskom poštom, a dopuna dnevnog reda se može izvršiti na samoj Skupštini.

Član 28.

Skupština Društva odlučuje o:

- a) statutu Društva i njegovim izmjenama i dopunama
- b) poslovnica o radu Skupštine, Nadzornog odbora i Odbora za reviziju na prijedlog Nadzornog odbora
- c) etičkom kodeksu na prijedlog Nadzornog odbora
- d) trogodišnjem planu poslovanja
- e) povećanju i smanjenju osnovnog kapitala
- f) usvajanju godišnjeg izvještaja o poslovanju Društva, koji uključuje finansijski izvještaj i izvještaj revizora, Nadzornog odbora i Odbora za reviziju
- g) rasporedu dobiti i isplati dobiti
- h) načinu pokrića gubitka
- i) spajanju sa drugim društvima i pripajanju drugih društava Društvu ili Društva drugom društvu
- j) promjeni oblika i podjeli Društva
- k) prestanku Društva provođenjem postupka likvidacije i o odobravanju početnog likvidacionog bilansa i završnog računa po

okončanju postupka likvidacije

- l) kupovini, prodaji, razmjeni, uzimanju ili davanju u lizing, uzimanju ili davanju kredita i drugim transakcijama imovinom, direktno ili posredstvom supsidijarnih društava, u toku poslovne godine u obimu većem od 33% knjigovodstvene vrijednosti imovine Društva po bilansu stanja na kraju prethodne godine na prijedlog Uprave i Nadzornog odbora
- m) imenovanju i razrješenju članova Nadzornog odbora pojedinačno
- n) imenovanju i razrješenju članova Odbora za reviziju pojedinačno
- o) naknadama članova Nadzornog odbora i Odbora za reviziju
- p) osnivanju, reorganizaciji i likvidaciji supsidijarnih društava, i odobravanju njihovih statuta
- q) izuzimanju stalnih sredstava u Društvu
- r) drugim pitanjima bitnim za poslovanje Društva u skladu sa zakonom.

Član 29.

(1) Nadzorni odbor Društva čine predsjednik i dva člana, koje imenuje i razrješava Skupština Društva.

(2) Članovi nadzornog odbora imenuju se istovremeno na period od četiri godine, s tim da po isteku perioda od dvije godine od dana imenovanja skupština društva glasa o povjerenju članovima nadzornog odbora.

(3) Na prvoj konstituirajućoj sjednici nadzornog odbora članovi Nadzornog odbora biraju predsjednika i zamjenika predsjednika Nadzornog odbora.

Član 30.

(1) Skupština Društva može razriješiti predsjednika i članove Nadzornog odbora i prije isteka perioda na koji su imenovani kad:

- a) nadzorni odbor ili pojedini njegov član izgubi povjerenje Skupštine
- b) skupština odbije usvojiti godišnji izvještaj Društva koji uključuje finansijski izvještaj i izvještaje revizora, Nadzornog odbora i Odbora za reviziju;
- c) skupština utvrdi odgovornost predsjednika i članova Nadzornog odbora za štetu koju je pretrpilo Društvo zbog razloga iz člana 258. i 261. Zakona o privrednim društvima;
- d) podnesu ostavku.

(2) Ukoliko predsjednik ili član Nadzornog odbora u toku trajanja mandata bude razriješen, a kada se ne razrješava cijeli Nadzorni odbor, članu koji je imenovan umjesto razriješenog mandat traje do isteka mandata članova Nadzornog odbora koji su imenovani prilikom imenovanja cijelog Nadzornog odbora, a nisu razriješeni.

Član 31.

(1) Postupak izbora i imenovanja članova Nadzornog odbora provodi se na osnovu javnog konkursa objavljenog u Službenim novinama Federacije Bosne i Hercegovine i jednom dnevnom listu dostupnom široj javnosti, a u skladu sa Zakona o ministarskim, vladinim i drugim imenovanjima u Federaciji Bosne i Hercegovine ("Službene novine FBiH", broj: 12/03, 34/03 i 65/13), Zakona o javnim preduzećima u Federaciji BiH ("Službene novine FBiH", broj: 8/05, 81/08, 22/09 i 109/12) i posebnom odlukom osnivača Društva.

(2) Postupak provodi komisija za izbor, koju imenuje osnivač Društva, a koja se sastoji od 5 (pet) članova.

Član 32.

(1) Nadzorni odbor odluke donosi na sjednicama koje se održavaju u sjedištu Društva.

(2) Izuzetno kada je u pitanju hitno donošenje odluka sjednica se može održati telefonskim, odnosno elektronskim putem.

(3) Donošenje odluka Nadzornog odbora na telefonskim, odnosno elektronskim sjednicama dozvoljeno je ako se tome ne protivi niti jedan član Nadzornog odbora.

Član 33.

(1) Za održavanje sjednice Nadzornog odbora potreban je kvorum od dvije trećine ukupnog broja članova.

(2) Nadzorni odbor odluke donosi većinom glasova prisutnih članova.

Član 34.

(1) Pisani poziv za sjednicu Nadzornog odbora u kojem su naznačeni mjesto i datum održavanja, vrijeme početka i dnevni red sjednice dostavlja se članovima Nadzornog odbora najkasnije u roku 14 dana prije datuma održavanja sjednice.

(2) Uz poziv za sjednicu dostavljaju se materijali za svaku tačku dnevnog reda.

(3) U hitnim slučajevima može se utvrditi i kraći rok od roka iz stava (1) ovog člana.

Član 35.

(1) Sjednica Nadzornog odbora održava se najmanje jednom u 3 (tri) mjeseca.

(2) Sjednicu Nadzornog odbora saziva predsjednik Nadzornog odbora.

(3) Predsjednik Nadzornog odbora dužan je sazvati sjednicu na zahtjev direktora Društva ili dva člana nadzornog odbora, najkasnije 14 (četrnaest) dana od dana podnošenja zahtjeva, u protivnom sjednicu je ovlašten sazvati podnosilac zahtjeva.

Član 36.

Djelokrug rada Nadzornog odbora je:

- a) nadzire poslovanje Društva, usvaja poslovne strategije Društva i planove poslovanja te predlaže Skupštini društva usvajanje trogodišnjeg plana poslovanja
- b) nadzire rad Uprave
- c) utvrđuje prijedloge Statuta i Poslovnika o radu Skupštine, Nadzornog odbora i Odbora za reviziju i njihove izmjene i dopune i predlaže ih Skupštini
- d) priprema etički kodeks i predlaže ga Skupštini
- e) bira predsjednika i zamjenika predsjednika Nadzornog odbora
- f) vrši izbor kandidata Odbora za reviziju i podnosi prijedlog za njegovo imenovanje Skupštini
- g) razmatra Pravilnik o javnim nabavkama i nadzire njegovo provođenje
- h) daje mišljenje Skupštini o prijedlogu Uprave za raspodjelu dobiti
- i) predlaže način pokrića gubitka
- j) bira članove Uprave i na osnovu predhodne saglasnosti Gradonačelnika iste imenuje i razrješava
- k) utvrđuje visinu plaće Upravi društva
- l) daje ovlaštenja za aktivnosti koje su ograničene propisima Zakona o javnim preduzećima
- m) daje upute direktoru za provođenje preporuka u vezi sa uočenim nepravilnostima od strane Odbora za reviziju i vanjskog revizora te nadzire Upravu u provođenju istih

- n) usvaja izvještaj Uprave o poslovanju po polugodišnjem i godišnjem obračunu, sa bilansom stanja i bilansom uspjeha i izvještajem Odbora za reviziju
- o) usvaja izvještaj Uprave o poslovanju po godišnjem obračunu, koji uključuje finansijski izvještaj i izvještaj revizora, Nadzornog odbora i Odbora za reviziju
- p) podnosi Skupštini godišnji izvještaj o poslovanju Društva, koji uključuje finansijski izvještaj i izvještaj revizora, Nadzornog odbora i Odbora za reviziju
- q) odobrava kupovinu, prodaju, zamjenu, uzimanje u lizing, uzimanje kredita i druge transakcije imovinom, direktno ili posredstvom supsidijarnih društava u toku poslovne godine u obimu od 15% (petnaest odsto) do 33% (trideset i tri odsto) knjigovodstvene vrijednosti ukupno imovine Društva, po bilansu stanja na kraju prethodne godine
- r) predlaže Skupštini kupovinu, prodaju, zamjenu, uzimanje u lizing, uzimanje kredita i druge transakcije imovinom, direktno ili posredstvom supsidijarnih društava u toku poslovne godine u obimu većem od 33% (trideset i tri odsto) knjigovodstvene vrijednosti ukupno imovine Društva, po bilansu stanja na kraju prethodne godine
- s) imenuje povremene komisije i utvrđuje njihov sastav i zadatke
- t) drugi poslovi predviđeni zakonom.

Član 37.

Nadzorni odbor ima obavezu i odgovornost osigurati:

- a) donošenje poslovnika kojim se utvrđuju operativni i funkcionalni aspekti rada Nadzornog odbora i Uprave u skladu sa Zakonom o javnim preduzećima u Federaciji BiH te Zakonom o privrednim društvima i Statutom i Etičkim kodeksom
- b) da je zakonitost poslovnika potvrđena od strane kvalificiranih, nezavisnih pravnih savjetnika
- c) da poslovnici sadrže detaljne odredbe o pravičnom postupku smjenjivanja za odgovorna lica koja su postupala nesavjesno i nepošteno ili su stupila u sukob interesa ili su osuđena zbog krivičnog djela ili novčano

kažnjena u skladu sa kaznama utvrđenim zakonom

- d) navedeni poslovnici sadrže odredbe o trajnom isključenju sa posla iz Društva na period od najmanje 10 (deset) godina za lica koja su smijenjena na način opisan u ovom stavu, uključujući i dužnost Uprave da za tu svrhu vodi adekvatne kadrovske evidencije.

Član 38.

(1) Nadzorni odbor ima obavezu i odgovornost da organizuje izradu vjerodostojnih računovodstvenih evidencija i finansijskih izvještaja, sačinjenih u skladu sa Zakonom o računovodstvu u Federaciji Bosne i Hercegovine iz kojih je vidljiv finansijski položaj Društva, te koje se daju na uvid svim licima koja imaju legitiman interes u poslovanju Društva.

(2) Obavezu iz stava (1) ovog člana Nadzorni odbor ne može prenositi na druge organe.

Član 39.

(1) Nadzorni odbor ima obavezu i odgovornost u saradnji sa Odborom za reviziju uraditi prijedlog Etičkog kodeksa koji će sadržavati obavezujuće odredbe u skladu sa Zakonom o javnim preduzećima Federacije BiH.

(2) Obavezu iz prethodnog stava Nadzorni odbor ne može prenositi na druge organe.

Član 40.

Svako kršenje pravila Etičkog kodeksa, predstavlja osnov za opoziv članova Nadzornog odbora.

Član 41.

(1) Uprava društva organizira rad i rukovodi poslovanjem, zastupa i predstavlja Društvo i odgovara za zakonitost poslovanja.

(2) Upravu Društva čini direktor.

Član 42.

(1) Mandat članova Uprave je četiri godine.

(2) Lice koje je imenovano na mjesto direktora Društva, a nije bilo u radnom odnosu u Društvu, zasniva radni odnos na određeno vrijeme.

Radni odnos na određeno vrijeme traje do isteka roka na koji je izabran direktor, odnosno do njegovog razrješenja.

(4) Položaj, ovlaštenja, odgovornosti i prava direktora Društva uređuju se ugovorom.

Član 43.

(1) Direktor Društva se bira na osnovu javnog konkursa iz reda kandidata koji po menadžerskim znanjima i iskustvu najbolje odgovara za izvršenje operativnih i poslovnih potreba Društva.

(2) Opšti i posebni uslovi za imenovanje direktora propisani su Pravilnikom o radu.

(3) Za direktora Društva ne može biti imenovano lice koje vrši funkciju u političkim strankama.

Član 44.

(1) Javni konkurs se raspisuje na osnovu odluke Nadzornog odbora Društva.

(2) Za provođenje procedure izbora Nadzorni odbor imenuje Komisiju koja se sastoji od tri člana.

(3) Zadatak Komisije je razmatranje prijave po javnom konkursu, sastavljanje liste sa užit izborom najboljih kandidata, intervju sa kandidatima i predlaganje rang-liste sa najboljim kandidatima putem pisane preporuke Nadzornom odboru.

(4) Nakon dostavljanja rang-liste od strane Komisije, Nadzorni odbor vrši izbor kandidata za direktora i upućuje Gradonačelniku zahtjev za davanje prethodne saglasnosti na imenovanje.

Po dobijanju prethodne saglasnosti Gradonačelnika, Nadzorni odbor vrši imenovanje direktora.

Imenovanje direktora će biti provedeno u skladu sa Zakonom o ministarskim, vladinim i drugim imenovanjima u Federaciji Bosne i Hercegovine.

Član 45.

Nadzorni odbor može uz prethodnu saglasnost Gradonačelnika razriješiti direktora i prije isteka mandata na koji je imenovan kada:

- a) direktor izgubi povjerenje Nadzornog odbora,
- b) Nadzorni odbor odbije usvojiti godišnji ili polugodišnji izvještaj Društva,
- c) Nadzorni odbor utvrdi odgovornost direktora za štetu koju je pretrpilo društvo,
- d) kada direktor podnese ostavku.

Član 46.

Djelokrug Uprave je:

- a) zastupa i predstavlja Društo prema trećim licima
- b) organizuje i vodi poslove Društva
- c) izrađuje prijedloge godišnjeg i trogodišnjeg plana poslovanja i ista dostavlja Nadzornom odboru
- d) izrađuje mjesečne, kvartalne, polugodišnje i godišnje izvještaje o poslovanju
- e) izvještava Nadzorni odbor na zahtjev Nadzornog odbora
- f) saziva Skupštinu
- g) provodi etički kodeks
- h) priprema prijedloge Statuta, Poslovnika o radu Skupštine, Nadzornog odbora, Odbora za reviziju i njihove izmjene i dopune i dostavlja ih Nadzornom odboru
- i) donosi Pravilnik o javnim nabavkama i provodi Zakon o javnim nabavkama Bosne i Hercegovine i podzakonske akte iz oblasti javnih nabavki
- j) priprema prijedlog odluke o raspodjeli dobiti i načinu pokrića gubitka
- k) odlučuje o zasnivanju i prestanku radnog odnosa radnika
- l) odlučuje o svim pravima radnika iz radnog odnosa
- m) donosi opšta akta Društva, čije donošenje nije u nadležnosti Nadzornog odbora ili Skupštine Društva
- n) stara se i odgovara za zakonitost rada Društva
- o) primjenjuje i provodi preporuke Odbora za reviziju i vanjskog revizora
- p) obavlja i druge poslove neophodne za nesmetano odvijanje organizacije i vođenja poslovanja Društva.

Član 47.

(1) Uprava je nadležna zaključivati ugovore u ime Društva.

(2) Direktor nema ovlaštenja zaključiti ugovor ili niz vezanih ugovora čija je stvarna ili procijenjena vrijednost veća od 10.000,00 KM bez prethodno pribavljene saglasnosti

Nadzornog odbora.

Član 48.

(1) Direktor ima obavezu i odgovornost osigurati da:

- a) licu koje je otpušteno iz razloga kršenja odredaba ovog Statuta ili pravila Etičkog kodeksa i ispraćeno van poslovnih prostorija u pratnji obezbjeđenja na dan suspenzije ili raskida ugovora bude spriječen ponovni ulazak u bilo kojem svojstvu u prostorije Društva
- b) trajno onemogućiti ponovno zapošljavanje takvog lica na bilo koju poziciju u periodu koji ne može biti kraći od 2 (dvije) godine
- c) osigura odgovarajuću arhiva o radnicima sa detaljnim podacima o otpuštanju navedenih osoba za period od 2 (dvije) godine
- d) navedenim otpuštenim licima, od momenta izvršenog kršenja radne dužnosti ne vrše isplate bilo u novcu ili umjesto toga u stvarima.

(2) Direktor može prenijeti bilo koju od obaveza navedenu u stavu (1) ovog člana pod uslovom jednoglasne pismene odluke članova Nadzornog odbora, ali će isti ostati odgovoran za izvršenje svih navedenih obaveza i odgovornosti.

Član 49.

(1) Direktor obavlja poslove iz svog djelokruga u interesu Društva i u vođenju poslova iz svog djelokruga postupajući s pažnjom dobrog privrednika te u skladu sa Etičkim kodeksom.

(2) Svako kršenje pravila Etičkog kodeksa osnov je za otkaz direktoru Društva.

DIO SEDMI - ODBOR ZA REVIZIJU**Član 50.**

(1) Društvo je dužno formirati Odbor za reviziju.

(2) Odbor za reviziju čine predsjednik i 2 (dva) člana, koje imenuje Skupština na osnovu provedenog javnog konkursa i prijedloga Nadzornog odbora.

Član 51.

Predsjednik i član Odbora za reviziju ne može biti član Nadzornog odbora i Uprave, zaposlen u Društvu, niti imati direktni ili indirektni finansijski interes u Društvu, izuzev naknade na osnovu te funkcije.

Član 52.

Odbor za reviziju ima obavezu i odgovornost:

- a) imenovati vanjskog revizora
- b) razmotriti godišnju studiju rizika i plan revizije u kojima su prikazane pojedinosti u pogledu rizičnih područja i revizija koje će se izvršiti, te obezbjeđuje da prijavljena pitanja budu bez odlaganja i na odgovarajući način korigovana
- c) razmatra studiju rizika i plan revizije
- d) podnositi Nadzornom odboru sažete mjesečne izvještaje o svojim sastancima svakog mjeseca
- e) konsultovati se sa glavnim revizorom u pogledu nezavisne revizorske organizacije ili strukovne slične grupe koja vrši stručno unutrašnje strukovno ocijenjivanje odjela za reviziju svake 2 (dvije) do 3 (tri) godine.

Član 53.

(1) Uprava je dužna i odgovorna za realizaciju preporuka Odbora za reviziju u rokovima koje u pogledu realizacije preporučiti Odbor za reviziju.

(2) Uprava može prenijeti ovu dužnost, ali je i dalje odgovorna za njenu realizaciju.

Član 54.

Organi upravljanja Društva su dužni saradivati sa članovima Odbora za reviziju te učiniti dostupnim sve dokumente, finansijske i računovodstvene iskaze na zahtjev Odbora.

Član 55.

Odbor za reviziju odgovora direktno Skupštini Društva.

DIO OSMI - SUKOB INTERESA**Član 56.**

Povezano lice je svaki radnik Društva, uključujući i pojedince i zastupnike koje Društvo imenuje za obavljanje određenih djelatnosti, svaki član Nadzornog odbora i Odbora za reviziju, svako javno preduzeće ili pojedinac u čijem posrednom ili neposrednom vlasništvu je najmanje 10% od ukupne sume glasačkih prava.

Član 57.

(1) Povezano lice ne smije stupati u stvarne ili očigledne sukobe interesa sa Društvom u ličnim ili profesionalnim odnosima.

(2) Sukob interesa javlja se kada lični, odnosno profesionalni interes povezanog lica onemogućava, eventualno može onemogućiti ili interes, ili poslovanje društva ili sposobnost povezanog lica da ispunjava svoje obaveze i odgovornosti.

(3) Povezano lice dužno je omogućiti uvid Upravi ili Nadzornom odboru ili drugom nadzornom organu u sve transakcije ili odnose za koje povezano lice opravdano očekuje da bi mogle dovesti do stvarnog ili očiglednog sukoba interesa sa Društvom.

(4) Društvu nije dozvoljeno da prilikom poslovanja povezanim licima nudi povoljnije uslove od onih koje nudi drugim licima koja nisu povezana sa Društvom.

Član 58.

U smislu člana 56. ovog Statuta, slijedeća lica se smatraju povezanim licima:

- a) članovi uže porodice povezanih lica do trećeg stepena krvnog srodstva ili tazbine, odnosno lica koja žive u zajedničkom domaćinstvu sa povezanim licima,
- b) pravna lica koja raspolazu glasačkim pravima u Društvu,
- c) pravna lica u kojima sa najmanje 5% sume glasačkih prava raspolaže povezano lice,
- d) pravna lica u kojima Društvo ima udio od najmanje 10% od ukupne sume glasačkih prava,
- e) pravna lica u kojima Društvo ima udio od najmanje 10% dionica sa pravom glasa,
- f) pravna lica u kojima je povezano lice, ili članovi uže porodice, član Nadzornog odbora ili Uprave.

Član 59.

Ako povezano lice zna ili je moralo znati da je neko drugo povezano lice djelovalo u suprotnosti sa odredbama članova 57. i 58. ovog Statuta, to povezano lice je o tome dužno odmah obavijestiti Upravu i Nadzorni odbor ili drugi nadzorni organ i druge nadležne organe.

DIO DEVETI - USVAJANJE I PRIMJENA ETIČKOG KODEKSA**Član 60.**

Društvo je dužno usvojiti Etički kodeks koji predstavlja integralni dio obaveza i odgovornosti članova Uprave i Nadzornog odbora za cijelo vrijeme trajanja njihovog angažmana u Društvu.

Član 61.

Nadzorni odbor je dužan i odgovoran da, u saradnji sa Odborom za reviziju, pripremi etički kodeks.

Član 62.

Etički kodeks Društva sadržavaće najmanje pravila o konfliktu interesa, povezanim licima, povjerljivosti, fer postupanju, zaštiti i ispravnoj upotrebi sredstava Društva, postupanju u skladu sa važećim propisima kao i internim aktima Društva, prijavljivanju nezakonitog ili neetičkog ponašanja, unutrašnjoj trgovini, odobravanju kredita povezanim licima i članovima upravnog i Nadzornog odbora, upoznavanju sa pravilima Etičkog kodeksa Društva te nemogućnosti odricanja od istih.

Član 63.

Uprava je dužna i odgovorna:

- a) za dosljedno provođenje Etičkog kodeksa u Društvu,
- b) da osigura da sva odgovorna lica postupaju u skladu sa Etičkim kodeksom tako što će se protiv lica koja krše navedeni kodeks provesti disciplinski postupak.

Član 64.

(1) Svako kršenje odredaba etičkog kodeksa od strane radnika smatra se povredom radne obaveze, a koja se odgovornost za istu povredu, kao i primjena odgovarajuće mjere utvrđuje shodno odredbama Pravilnika o radu Društva.

(2) O odgovornosti i primjeni odgovarajuće mjere u slučaju svakog kršenja odredaba etičkog kodeksa odlučuje Skupština Društva.

DIO DESETI - RASPODJELA DOBITI I NAČIN POKRIĆA GUBITAKA**Član 65.**

U slučaju kada Društvo na kraju poslovne godine, po revidiranom finansijskom izvještaju utvrđenom u skladu sa Zakonom o računovodstvu i reviziji u Federaciji BiH iskaže dobit, odluku o raspodjeli dobiti donosi Skupština Društva na obrazložen prijedlog Uprave, uz prethodno pribavljeno mišljenje Odbora za reviziju i Nadzornog odbora.

Član 66.

(1) Prilikom odlučivanja o iznosu koji može biti raspoređen, Uprava Društva će voditi računa o instrukcijama datim od strane Odbora za reviziju te ukupnim obavezama Društva u godini na koju se raspodjela dobiti odnosi, uključujući i iznos neophodan za realizaciju plana poslovanja za tekuću finansijsku godinu kao i iznos neophodan za druge investicije i očekivano održavanje i rast Društva.

(2) Da bi dobit bila raspodijeljena, ista mora biti pismeno potvrđena od strane većine u Odboru za reviziju, Nadzornom odboru te izglasana na Skupštini Društva.

Član 67.

Ukoliko Društvo na kraju finansijske godine iskaže gubitak, isti se može pokrivati iz obaveznih rezervi Društva te na druge načine utvrđene zakonom, o čemu odluku donosi Skupština Društva.

DIO JEDANAESTI- POSTUPAK NABAVKE**Član 68.**

Svi postupci nabavke od strane Društva bit će provedeni uz strogo poštivanje odredaba Zakona o javnim nabavkama Bosne i Hercegovine, podzakonskim aktima i Pravilnikom o javnim nabavkama Društva.

Član 69.

Uprava Društva dužna je:

- a) donijeti Pravilnik o javnim nabavkama koji će regulisati postupak nabavke u skladu sa važećim propisima
- b) nadzirati radnike Društva u primjeni propisa o nabavci i Pravilnika o javnim nabavkama Društva

- c) imenovati komisije za nabavku za sve nabavke propisane odredbama važećih propisa o nabavci
- d) pripremati izvještaje o postupcima nabavke zahtijevanim prema važećim propisima o nabavci
- e) podnositi izvještaj o nabavci Odboru za reviziju u roku od 15 dana i Nadzornom odboru u roku od 30 dana od dana zaključenja ugovora o nabavci.

Član 70.

U postupku nabavke Nadzorni odbor ima obavezu i odgovornost kako slijedi:

- a) razmatrati Pravilnik o javnim nabavkama u smislu usaglašenosti istog sa važećim propisima o nabavci
- b) vršiti nadzor nad radom Uprave i radnika Društva u pogledu primjene Pravilnika o javnim nabavkama Društva i važećih propisa o nabavkama
- c) razmatrati izvještaje o nabavci te prijaviti nadležnim organima sve eventualne prevare ili zloupotrebe.

Član 71.

U postupku nabavke Odbor za reviziju odgovoran je za:

- a) mjesečni pregled izvještaja o nabavci
- b) pismeno izvještavanje Skupštine ili drugog nadležnog tijela Društva o bilo kakvom kršenju važećih propisa o nabavkama.

Odbor za reviziju ne može delegirati svoje obaveze drugim tijelima Društva.

Član 72.

(1) Uprava, članovi Nadzornog odbora i članovi Društva su sa Društvom povezana lica u pogledu postupka i ciljeva važećih propisa o nabavci.

(2) Ukoliko na bazi izvještaja o nabavci ili na bazi druge informacije, Nadzorni odbor nađe da je došlo do kršenja Etičkog kodeksa ili važećih propisa o nabavkama ili Pravilnika o javnim nabavkama u Društvu, Društvo bez odlaganja mora preduzeti korake za suspendovanje sa posla odgovornog lica te provođenje pune istrage.

(3) Ukoliko Nadzorni odbor nađe da je došlo do kršenja važećih propisa o nabavkama ili Etičkog

kodeksa, odbor će preporučiti otpuštanje odgovornog lica.

(4) Za provođenje mjera predloženih od strane Nadzornog odbora, predviđenih u prethodnim stavovima ovog člana, odgovorna je Uprava Društva.

DIO DVANAESTI - PLANIRANJE POSLOVANJA DRUŠTVA

Član 73.

(1) Koristeći se "Međunarodnim računovodstvenim standardima" kojima se uređuju ova pitanja, Uprava Društva, izrađuje i nadgleda realizaciju trogodišnjeg plana poslovanja.

(2) Nakon što Skupština usvoji trogodišnji plan poslovanja, isti će biti predložen vanjskom revizoru i nadležnoj gradskoj službi.

(3) Trogodišnji plan poslovanja će sadržavati slijedeće:

- a) predviđanje prihoda i rashoda
- b) kapitalne izdatke predložene za period koji plan poslovanja obuhvata
- c) izbor finansija predloženih za navedene kapitalne izdatke, te druge poslovne ciljeve
- d) sve zajmove i kredite čije je uzimanje planirano u periodu koji plan poslovanja obuhvata
- e) garancije čije je davanje predloženo za osiguranje tih zajmova odnosno kredita
- f) prijedloge za osnivanje ili kupovinu novih preduzeća ili poslova (bilo u cjelini ili djelimično) ili prodaju bilo kojeg od zavisnih preduzeća (tj. supsidijara) Društva, te kadrovsku popunu kao i prateće rashode za ovakve aktivnosti
- g) prijedloge za korištenje i raspodjelu dobiti za period obuhvaćen planom poslovanja
- h) plan prihoda i rashoda mora održavati planirane aktivnosti
- i) zapošljavanje kao i predviđene troškove za isto.

Član 74.

(1) Plan poslovanja će za period za koji je donesen, predstavljati osnov poslovnih aktivnosti Društva.

(2) Uprava će godišnje usaglašavati plan poslovanja te u slučaju potrebe, a u skladu sa ciljevima istog, revidirati i usaglasiti isti radi prilagođavanja plana poslovanja tržišnim uslovima.

Član 75.

U skladu sa usvojenim trogodišnjim planom poslovanja Uprava društva izrađuje i Nadzornom odboru dostavlja prijedlog godišnjeg plana poslovanja.

DIO TRINAESTI - OSNIVANJE I KUPOVINA DRUGIH PREDUZEĆA

Član 76.

(1) Društvo može osnivati ili kupovati druga preduzeća pod uslovom da za to postoji odluka Skupštine Društva i ako su kumulativno ispunjeni uslovi kako slijedi:

- a) da je društvo koje se osniva odnosno koje se kupuje direktno vezano za djelatnost koju

Društvo obavlja i

- b) ako će se osnivanjem odnosno kupovinom drugog društva ostvariti direktna korist

Društvu ili će se osnivanjem ili kupovinom drugog preduzeća postići najracionalnija iskorištenost postojećih kapaciteta Društva.

DIO ČETRINAESTI- PRIMJENA KNJIGOVODSTVENIH I FINANSIJSKIH RAČUNOVODSTVENIH STANDARDA

Član 77.

(1) Nadzorni odbor je odgovora da organizuje izradu i primjenu vjerodostojnih računovodstvenih evidencija i finansijskih iskaza, sačinjenih u skladu sa Zakonom o računovodstvu i reviziji Federacije Bosne i Hercegovine iz kojih je vidljiv finansijski položaj Društva.

(2) nadzorni odbor je obavezan da omogućiti uvid u računovodstvene evidencije i finansijske iskaze iz stava (1) ovog člana svim licima koja imaju legitiman interes za poslovanje Društva.

(3) Nadzorni odbor ovu dužnost ne može prenositi na druge organe.

Član 78.

Uprava ima obavezu i odgovornost da izvršava preporuke revizora u datim rokovima za izvršenje.

DIO PETNAESTI - FOND REZERVI DRUŠTVA**Član 79.**

(1) Društvo je obavezno imati fond rezervi, koji iznosi najmanje 25% osnovnog kapitala Društva.

(2) Fond rezervi formira se iz dobiti i drugih izvora u skladu sa Zakonom o privrednim društvima i drugim propisima.

(3) U fond rezervi izdvaja se najmanje 10% godišnjeg iznosa neto dobiti sve dok fond rezervi ne dostigne iznos iz stava 1. ovog člana.

(4) Ukoliko izdvajanjima iz stava 3. ovog člana fond rezervi ne dostigne visinu od 25% osnovnog kapitala Društva do kraja pete poslovne godine, po godišnjem obračunu za petu i naredne poslovne godine, Društvo će povećati izdvajanja za ove namjene na 20% godišnjeg iznosa neto dobiti sve dok fond rezervi ne dostigne iznos iznosa od 25% osnovnog kapitala Društva.

Član 80.

Fond rezervi koristi se za pokriće gubitka i drugih nepredviđenih troškova u poslovanju Društva.

DIO ŠESNAESTI - ZABRANJENE I OGRANIČENE AKTIVNOSTI DRUŠTVA**Član 81.**

Društvu nije dopušteno:

- a) davanje kredita ili pozajmica radnicima Društva ili trećim licima ili pružanje garancija ili osiguranja za kredite osim u procesu prestrukturiranja kada Društvo može izvršiti ulaganje ili dati pozajmicu privrednom društvu isključivo na osnovu odluke Skupštine Društva
- b) davanje putem donacija u suprotnosti sa odredbama važećih propisa o dodjeli sredstava ili donacijama
- c) isplata plaće radnicima na bilo kakvoj listi čekanja
- d) isplata plaće radnicima bez uplate doprinosa i poreza u skladu sa važećim zakonskim propisima
- e) učesće u postupku nabavke u svojstvu ponuđača bilo kojeg lica koje je pripremalo poziv za tender
- f) vršenje izmjena i dopuna bilo kojem već zaključenom ugovoru o nabavci, osim ako nisu izvršene u skladu sa važećim

zakonima o javnim nabavkama BiH

- g) prihvatanje plaćanja sredstvom koji zamjenjuje novac, plaćanja u naturi ili gotovinskom ekvivalentu
- h) investiranje iz kratkoročnih izvora sredstava Društva, osim kada se radi o odobrenim investicijama prema definiciji datoj u važećim zakonima koji regulišu tu oblast
- i) zaključenje ugovora o raspolaganju sa ukupnom vrijednošću većom od 10.000,00 KM, bez potpisa direktora i odlukom Nadzornog odbora
- j) obnavljanje ili materijalno mijenjanje postojećih zajmova dodijeljenih povezanim licima ili trećim stranama.

Član 82.

Društvo može poduzimati sljedeće aktivnosti, isključivo uz pismeno ovlaštenje Nadzornog odbora:

- a) izmirenje duga prema povjeriocu Društva plaćanjem trećem licu (ugovor o cesiji duga)
- b) prebijanje duga prema nekoj strani sa dugovima te iste strane koja je iz tog razloga istovremeno i povjerilac i dužnik Društva (ugovori o prostoju kompenzaciji)
- c) učesće u aranžmanu višestrukog prebijanja dugova između više strana bilo da je isti aranžman organizirala vlada ili drugi organ (ugovori o multilateralnoj odnosno višestranjoj kompenzaciji)
- d) izmirenje duga prema Društvu u slučaju da dužnik plaća prema povjeriocu Društva;
- e) otpis potraživanja
- f) zaključivanje ugovora o izmirenju dospjelog duga prema javnom preduzeću, pod povoljnijim uslovima koje utvrđuje Vlada Federacije Bosne i Hercegovine.

DIO SEDAMNAESTI - POSLOVNA TAJNA**Član 83.**

(1) Poslovnom tajnom smatraju se informacije o poslovanju za koje je očito da bi prouzrokovale značajnu štetu Društvu ako dođu u posjed trećeg lica bez saglasnosti Društva.

(2) Poslovna tajna uključuje svaku informaciju koja se odnosi na poslovanje Društva koja može biti od koristi za konkurente, kao što su proizvodni proces, inženjerski i tehnički projekti i nacrti, specifi-

kacije proizvoda, liste klijenata, poslovna strategija, te informacije vezane za finansije, prodaju i marketing.

(3) Za poslovnu tajnu ne mogu se odrediti podaci koji su javni po relevantnim važećim propisima i podaci o kršenju zakona i drugih propisa.

Član 84.

Uprava Društva dužna je pismenim aktom odrediti informacije koje imaju karakter poslovne tajne i lica odgovorna za njihovo korištenje i zaštitu.

DIO OSAMNAESTI- OPŠTI AKTI

Član 85.

Opšti akti Društva su:

- a) pravilnici i poslovnici;
- b) odluke Uprave,
- c) odluke Nadzornog odbora
- d) odluke Skupštine

DIO DEVETNAESTI- PRESTANAK DRUŠTVA

Član 86.

(1) Društvo prestaje gubitkom svojstva pravnog lica.

(2) Društvo prestaje na dan upisa prestanka u registar društava.

Član 87.

Društvo prestaje u skladu sa zakonom i Statutom:

- q) spajanjem, pripajanjem i podjelom;
- r) odlukom Skupštine Društva
- s) odlukom suda;
- t) stečajem.

Član 88.

Odluku o prestanku Društva donosi osnivač Društva.

DIO DVADESETI - PRIJELAZNE I ZAVRŠNE ODREDBE

Član 89.

Na pitanja koja nisu regulisana odredbama ovog Statuta shodno se primjenjuju odredbe Zakona o javnim preduzećima u Federaciji BiH i Zakona o privrednim društvima Federacije BiH.

Član 90.

(1) Opšti akti Društva uskladit će se sa Statutom Društva u roku od tri mjeseca od stupanja na snagu ovog Statuta.

(2) Izmjene i dopune Statuta vrše se po postupku za njegovo donošenje.

Član 91.

Stupanjem na snagu ovog Statuta prestaje da važi Statut Društva, broj: 02-49-11417/07 od 04.04.2007. godine, sa svim izmjenama i dopunama.

Član 92.

Ovaj Statut stupa na snagu danom usvajanja.

Broj: 02-49-2575/18

Datum: 19.03.2018. godine

GRADONAČELNIK
Fuad Kasumović, s.r.

**JP ZA UPRAVLJANJE I ODRŽAVANJE
SPORTSKIH OBJEKATA D.O.O. ZENICA****181.**

Na osnovu člana 12. Zakona o javnim preduzećima („Službene novine FBiH”, broj: 8/05), člana 24. 29. i 32. Statuta Javnog preduzeća za upravljanje i održavanje sportskih objekata d.o.o. Zenica i Zaključka Gradonačelnika Grada Zenice, u funkciji Skupštine JP o davanju saglasnosti za imenovanje direktora Javnog preduzeća za upravljanje i održavanje sportskih objekata d.o.o, Zenica, broj: 02-49-15915/18 od 26.07.2017. godine, Nadzorni odbor preduzeća je, na svojoj XVII sjednici, održanoj dana 07.08.2018. godine, donio

O D L U K U**o izboru i imenovanju direktora Javnog
preduzeća za upravljanje i održavanje sportskih
objekata d.o.o. Zenica i sklapanju Ugovora o
angažmanu****I**

Za direktora Javnog preduzeća za upravljanje i održavanje sportskih objekata d.o.o. Zenica imenuje se Nedim Talić, na period od 4 godine.

II

Imenovani će sklopiti Ugovor o angažmanu direktora Javnog preduzeća za upravljanje i održavanje sportskih objekata d.o.o. Zenica kojim će biti regulisana prava i obaveze.

III

Odluka stupa na snagu danom donošenja, a primjenjivat će se po okončanju žalbenog roka .

IV

Odluka će se objaviti u “Službenim novinama Federacije BiH” i “Službenim novinama Grada Zenica”.

Broj: 1110/18-1 /18

Zenica, 07.08.2018. godine

*PREDSJEDNIK**NADZORNOG ODBORA**Mirsad Dervenčić, s.r.*

SADRŽAJ

GRADSKO VIJEĆE

162. Odluka o nerazvrstanim cestama grada Zenica	1
163. Odluka o utvrđivanju javnog interesa uređenja korita Ciganski potok u naselju Topčić Polje	7
164. Odluka o dodjeli građevinskog zemljišta u vlasništvu Grada Zenica licima izabranim u projektu oporavka od poplava i klizišta iz maja i avgusta 2014. godine	8
165. Odluka o dodjeli mandata kandidatu za predsjednika Savjeta MZ "Klopče"	9
166. Odluka o dodjeli mandata kandidatu za člana Savjeta MZ "Klopče"	9
167. Rješenje o razrješenju dužnosti predsjednika Savjeta MZ "Klopče"	10
168. Rješenje o razrješenju dužnosti člana Savjeta MZ "Klopče"	10

GRADONAČELNIK

169. Naredba o provođenju obavezne preventivne sistematske deratizacije, dezinfekcije i dezinskcije na području Grada Zenica - jesenja faza 2018. godine	10
170. Zaključak o odobravanju korištenja imena Grada Zenica u nazivu Društva sa ograničenom odgovornošću	12
171. Zaključak o odobravanju izdvajanja sredstava iz tekuće budžetske rezerve	12
172. Zaključak o preraspodjeli sredstava u Budžetu Grada Zenica za 2018. godinu	13
173. Zaključak o uvećanju sredstava u Budžetu Grada Zenica za 2018. godinu	13
174. Zaključak o preraspodjeli sredstava u Budžetu Grada Zenica za 2018. godinu	14
175. Zaključak o preraspodjeli sredstava u Budžetu Grada Zenica za 2018. godinu	14
176. Zaključak o preraspodjeli sredstava u Budžetu Grada Zenica za 2018. godinu	15
177. Zaključak o odobravanju izdvajanja sredstava iz tekuće budžetske rezerve	16
178. Zaključak o preraspodjeli sredstava u Budžetu Grada Zenica za 2018. godinu	16
179. Zaključak o odobravanju izdvajanja sredstava iz tekuće budžetske rezerve	17

JP "PARKING SERVIS" D.O.O. ZENICA

180. Statut JP "Parking servis" d.o.o. Zenica	17
---	----

JP ZA UPRAVLJANJE I ODRŽAVANJE SPORTSKIH OBJEKATA D.O.O. ZENICA

181. Odluka o izboru i imenovanju direktora Javnog preduzeća za upravljanje i održavanje sportskih objekata d.o.o. Zenica i sklapanju Ugovora o angažmanu	31
---	----